

Carta najndyee na seicwanom Pablo na m'aⁿ nn'aⁿ tsjoom Corinto

Xmaⁿndye nn'aⁿ na cwila'yu' tsjoom Corinto

¹ Maja Pablo, cwiluiindyo^o apóstol cwentaa'¹ Jesucristo na mañeiquaya ñ'oom naya 'naaⁿaⁿ ndaq^a nn'aⁿ nc'e na l'ue ts'om Ty'oots'om. Nquii nn'aⁿya Sóstenes matseijomñê ñ'eⁿndyo^o na matseiljeiya cartawaañe. ² Matseicwanoⁿya juuna' ndaq^a 'o nn'aⁿ na cwiluiindyo' tmaaⁿ na macwjilⁱ Ty'oots'om cwentaaⁿ'aⁿ na m'aⁿ'yo' tsjoom Corinto, 'o na maqueⁿñooⁿ cwentaaⁿ'aⁿ nc'e Cristo Jesú^s, na jndq^a tqueenⁿñê na calajomndyo^o ñ'eⁿñê, ndo^o mati ñ'eⁿ nn'aⁿ meiⁿquiayuucheⁿ na cwilcwii'na xuee^o Ta Jesucristo, na cwiluiiñê na matsaⁿntjoom joona ndo^o mati jaa. ³ Nquii Tsoty^qaya Ty'oots'om ñequio Ta Jesucristo catio'naaⁿndyena 'o. Quiana na meiⁿcwii ñomtiuu tic'om'yo' jo ndaq^ana.

Matio'naaⁿñe Ty'oots'om nn'aⁿ nc'e Cristo

⁴ Ñequii'chenⁿ mañequia na quianl'uaa' Ty'oots'om cantyja 'naaⁿ'yo' ee naya na matseixmaaⁿ na mañequiaaⁿ na cwito'ñoom'yo' cantyja 'naaⁿ' Jesucristo. ⁵ Ndo^o nc'e na matseitjoom'na^o 'o ñ'eⁿñê, mañequiaa Ty'oots'om na la'xmaⁿ'yo' cha'tso nnom na mateijndeiina^o 'o jo nnoom, cha'tso na cwicanda^a na cwila'teinco'yo' ñ'oom'm ndaq^a nn'aⁿ ndo^o ñequio

na cwila'noⁿ'ya'yo' cantyja 'naaⁿ'aⁿ. ⁶ Ndo' na luaa', juu ñ'oom cantyja 'naaⁿ' Cristo teitquioo' na mayuu' juuna' cantyja 'naaⁿ'yo'. ⁷ Ndo' na ljo', titseitjoona' 'o meiⁿcwii nnom na mañequiaa Ty'oots'om cha cwicandaa^a cwil'a'yo' ts'iiaaⁿ 'naaⁿ'aⁿ yocheⁿ na cwimeiⁿndo'yo' na nncueeⁿ xuee quia na nncwjee'nnda' Ta Jesucristo. ⁸ Nquii Ty'oots'om wjaachequiaaⁿ najnda'yo' na cwindyeⁿtjom'tyeⁿ'yo' nnoom. Ndo' wjaach'eeⁿ na ljo' hasta na nncueⁿtyjoⁿ xuee na nncwjee'nnda' Jesucristo na nntu'xeⁿndye nn'aⁿ. Quia jo' nleitquioo' na tatja'aⁿ jnaⁿ cwicwila'xmaⁿ'yo'. ⁹ Ty'oots'om ñequiⁿcheⁿ matseicañaa^a ñ'oom na jndaa^a tjoom'm na cjoom'm, ndo' manquiityeeⁿ jndaa^a tqueeⁿ'ñê 'o na calajomndyoⁿ ñequio Jnaaⁿ Jesucristo na cwiluiiñe na matsaⁿtjom jaa.

Nn'aⁿ tsjoom Corinto na cwila'yu' titjoom' m'aⁿna

¹⁰ O nn'aⁿya na cwila'yu'yo' ñequio Jesucristo na cwiluiiñe na matsaⁿtjom jaa, ñequio najndeii na cwiluiiñe matseity'oondyoⁿ ndaa^a'yo' na c'om'yo' na tjoom' m'aⁿ'yo' ñequio nc'iaaⁿ'yo' na cwila'yu', tanc'om'yo' na meiⁿtoⁿ ñ'eⁿndyena. C'om'yo' na ñecwiixjeⁿ nquiu'yo' ñ'eⁿndyena. ¹¹ Luaaⁿ matsjooⁿ ndaa^a'yo' 'o nn'aⁿya ee joo nn'aⁿ waaⁿ Cloé jndaa^a jluena nooⁿya na m'aⁿntiaaⁿndyoⁿ ñequio ntyjee'yo' na cwilayu'. ¹² Luaa waa na ñe'catsjooⁿ cantyja 'naaⁿ' ñ'oomwaa', ñ'eenⁿndyoⁿ 'o na cwindu'yo': "Ja matseijomndyoⁿ cantyja 'naaⁿ' Pablo"; nt'omndyoⁿ 'o: "Ja ñ'eⁿ Apolos"; ndo' nt'omndyoⁿ: "Ja ñ'eⁿ Pedro"; ndo' nt'omndyoⁿ: "Ja

ñ'eⁿ Cristo". ¹³ ¿Aa nts'aacheⁿna' na matoⁿñe Cristo? Ndo' ja Pablo, ¿aa ty'ioom nn'aⁿ ja ts'oom'naaⁿ cwenta'yo'? Oo, ¿aa ñequio xueeya teits'oomndyo'? ¹⁴ Quianl'uaa' Ty'oots'om na macandä Crispo ñ'eⁿ Gayo na seits'oomndyo, tja'aⁿ nt'omndyo' 'o na seits'oomndyo, ¹⁵ cha tjaa 'ñeeⁿ nndaaq nntso na ñequio xueeya seits'oomndyo jom. ¹⁶ Ndo' je' macjaañjoom' ts'ooⁿ na mati seits'oomndyo Estéfanas ñequio nn'aⁿ waⁿaⁿ. Meiⁿ tileicjaañjoom'ti ts'ooⁿ aa m'aⁿ nt'omndyo' 'o na seits'oomndyo. ¹⁷ Ee nchii ty'lom Cristo ts'iaaⁿ ja na catseits'oomndyo nn'aⁿ. Jñoom ja na catseicandiyya nn'aⁿ na macwji'n'maaⁿñê añmaaⁿna, meiⁿ nchii nts'aaya ts'iaaⁿñeeⁿ ñequio ñ'oom na jndo' n'om nn'aⁿ, ee xeⁿ naljo', juu ñ'oom cantyja 'naaⁿ na ty'ioom nn'aⁿ jom ts'oom'naaⁿ, tja'aⁿ najndeii na matseixmaⁿna'.

Cristo cwiluiiñê najndeii Ty'oots'om ñequio na jndo' ts'om

¹⁸ Ndäa^q nn'aⁿ na cwi'ootsuundye añmaaⁿ, juu ñ'oom na ty'ioom nn'aⁿ Cristo ts'oom'naaⁿ, nquiuna ticajndana', saa^q jo ndaa^q jaa na matsaacalui'n'maaⁿndyo, tseixmaⁿna' ñ'oom najndeii cantyja 'naaⁿ Ty'oots'om. ¹⁹ Cha'xjeⁿ matseicandii ñ'oom'm na teiljeii:

Nn'aⁿ na jeeⁿ jndye nquiu,
nnts'aa na catyuii' na jndo' n'omna,
ndo' juu na jeeⁿ cwila'nqⁿna, nnts'aa na cwe'
ts'iaaⁿndyo juu jo'.

²⁰ Nc'e lcaa' tso ljeii'ñeeⁿ, ¿yuu l'ueñe ts'aⁿ na jeeⁿ jndo' ts'om ndo' mati ts'aⁿ na jndye matsei'naaⁿ ndo' ñequio ts'aⁿ na jeeⁿ ya matseitjoom'

ñ'oom? Ee jnda tqueⁿ Ty'oots'om cha'tso na jndo'
n'om nn'aⁿ, cwe' ts'iaaⁿndyo joona'. ²¹ Nc'e na
jndo' ts'om Ty'oots'om, sei'nqoⁿoⁿ na nquiee nn'aⁿ
tsjoomnancue tixocata'jnaaⁿna jom cantyja 'naaⁿ
na jndo' n'omna, jo' chii majaawee' ts'oom na
nncwji'n'lmaaⁿñê añimaanⁿ nn'aⁿ cwe' cantyja 'naaⁿ
ñ'oom'm na cwiñequia nn'aⁿ, meiiⁿ cwitjeii'na
cwenta na juuna' ñ'oom na ticajnda tseixmaⁿna'.

²² Nn'aⁿ judíos cwitaⁿna na nnty'iaandaana cwii
ts'iaaⁿ t'maⁿ na tixocaluiina' na cwe' najndeii
nquiis ts'aⁿcha nla'yu'na. Saq nn'aⁿ na nchii judíos,
joona cwil'uee'ndyena ñ'oom na nntseijndo'tina'
n'omna cha na nla'yu'na, ²³ saq jâ cwiñequiaayâ
ñ'oom na ty'ioom nn'aⁿ Cristo ts'oom'naaⁿ.
Ñ'oom'ñeeⁿ tia nquiis nn'aⁿ judíos ndo' nn'aⁿ
na nchii judíos cwitjeii'na cwenta na jeeⁿ cje
tseixmaⁿna'. ²⁴ Ndo' cantyja 'naaⁿnn'aⁿna ma'maⁿ
Ty'oots'om, meiiⁿ nn'aⁿ judíos oo meiiⁿ nn'aⁿ
nt'omcheⁿ tsjaaⁿ, macwji'n'lmaaⁿñê nn'aⁿ, ndo'
na cwiluiñe na jndo' ts'oom. ²⁵ Ee juu na ndoo'
nquiis nn'aⁿ na tseixmaⁿna' na tixcwe mach'ee
Ty'oots'om jndo'ti ts'oom na lcaa' mach'eeⁿ,
nchiiti juu na jndo' n'om nn'aⁿ, ndo' juu na
cwitjeii'na cwenta na tijneiⁿ na tquiaanⁿ na lcaa'
tjom Cristo, juu jo' ma'moⁿna' na jndeityeeⁿ,
nchiiti cha'tso najnda na la'xmaⁿ nn'aⁿ. ²⁶ 'O
nn'aⁿya na cwila'yu'yo', queⁿ'yo' cwenta na
ma'maⁿ Ty'oots'om 'o mein' tijndyendyo' cwitjeii'
nn'aⁿ cwenta na la'xmaⁿyo' nn'aⁿ na jndo'
n'om, tijndyendyo' cwiluiindyo' nn'aⁿ na t'maⁿ
cwiluiindye, tijndyendyo' tuiindyo' nda nn'aⁿ
na tyandye. ²⁷ Ee macwjii'ñe Ty'oots'om nn'aⁿ

cwentaa^{n'a^n} na tijndo['] n'om cha catseijnaa^{n'na'}
 nn'aⁿ na ndoo['] nquiuna na jndo['] n'om nquieena.
 Ndo['] macwjii^{'ñê} cwentaa^{n'a^n} nn'aⁿ na tit'maⁿ
 cwiluiindy'e cha cantseijnaa^{n'na'} nn'aⁿ na waa na
 jndā la'xmaⁿ. ²⁸ Quii'ntaaⁿ nn'aⁿ tsjoomnancue
 macwjii^{'ñê} nn'aⁿ cwentaa^{n'a^n} na cje la'xmaⁿ,
 macwjii^{'ñê} nn'aⁿ na ticuee['] n'om nt'omchen nn'aⁿ,
 nn'aⁿ na cwitjeii['] nt'omchen cagenta na tjaa yuu
 l'uendye. Nmeii^{n'} mach'eeⁿ cha' m'mo^{n'na'} na joo
 nn'aⁿ na nquiua na t'maⁿ la'xmaⁿ ticjaaquiee[']
 cantyja 'naaⁿna. ²⁹ Cha'tso nmei^{n'} mach'eeⁿ
 cha meiⁿcwii ts'aⁿ tincwji's'añe tincwji'scuñe
 cheⁿnquia jo nnoom. ³⁰ Manquityeeⁿ jndā s'aaⁿ
 na tjoom['] cwiluiindyo['] cantyja 'naa^{n'} Cristo
 Jesú^s, ndo['] cantyja 'naa^{n'} jom cwicanda^{'yo'} na
 jndo['] n'om^{'yo'}, ndo['] na m'a^{n'}yo['] na tjaa jnaⁿ
 cwila^{'xma}^{n'}yo['], ndo['] na maqueⁿñ^ooⁿ 'o na lju[']
 n'om^{'yo'} jo nnoom, ndo['] na cwiluiⁿmaaⁿndyo['].
³¹ Cha'xjeⁿ na matseicandii ñ'o^m na teiljei:
 "Xeⁿ na m'aⁿ ts'aⁿ na ñe'catseis'añañe cheⁿnquia,
 cwji's'aaⁿ Ty'qots'om cantyja na mach'ee ñ'eⁿñ^ê."

2

Cristo jñoom ts'o^mnaaⁿ

¹ Sa^q 'o nn'aⁿya na cwila^{'yu}^{'yo}, quia
 tuacañ^ooⁿya 'o na nñequiaya ñ'o^m na mayuu[']
 na ticaliu nn'aⁿ cantyja 'naa^{n'} Ty'qots'om, nchii
 seinaⁿya ndaa^{'yo} ñ'o^m na jndo['] n'om nn'aⁿ meiⁿ
 nchii ñ'o^m na jeeⁿ ca'naa^{n'} na cwila^{'nei}ⁿ nn'aⁿ
 na jndye ñ'o^m nquia. ² Xjeⁿñ^{ee}ⁿ tyeⁿ tyom^{'aa}^{n'}
 ts^{'o}oⁿ na ñe'cwii ñ'o^m na nñequiaya ndaa^{'yo},
 ndo['] cantyja 'naa^{n'} nquia Jesucristo, sa^q ñequi^{'che}ⁿ

cantyja 'naa^{n!} na ty'lloom nn'aⁿ jom ts'oom'naaⁿ.
 3 Ñet'ooⁿya quii'ntaa^{n!}yo' na tijndo, tyoteindyo na tyocat'uq na aa nncjaacañjoom' ts'iaaⁿ na nnts'aa.
 4 Saa^q quia tyoñeuiaya ñ'oom' Ty'oots'om ndaq^a'yo', nchii seina^a ñ'oom na cwila'neiⁿ nn'aⁿ na jeeⁿjndo' n'om, tquioo' na nquii Espíritu ñequio najndeii na matseixmaaⁿ teil'uee'ñê ñ'oom'ñeeⁿ. 5 Luua' tuii cha juu na cwila'yu'ya n'om'yo' c'oomna' cantyja 'naa^{n!} najndeii na matseixmaⁿ Ty'oots'om, nchii cwe' nc'e juu na jndo' n'om nn'aⁿ.

*Nc'e Espíritu Santo, cwijaantyjoo' n'om nn'aⁿ
 cantyja 'naa^{n!} Ty'oots'om*

6 Saa^q jo ndaq^a nn'aⁿ na queen n'om na cwila'yu'ya n'om, cwilanqa^anyâ ñ'oom na jndo n'ooⁿyâ, saa^q juuna' titseijomna' cha'na juu na jndo' n'om nn'aⁿ tsjoomnancue, meiⁿ nchii cha'na ñ'oom na jndo' n'om nn'aⁿ na la'xmaⁿ n'iaaⁿ, na juu jo' wjaantycwii cantyja 'naaⁿna. 7 Ee jâ cwilanqa^anyâ ñ'oom na jndo' ts'om Ty'oots'om. Teiyoticheⁿ wanty'iuu' tyom'aaⁿ ñ'oom'ñeeⁿ ee tyoowe'ntyjo xjeⁿ na ntyjeeⁿ na caliu nn'aⁿ juuna'. Ee cwitjo^ochen na nlqueen tsjoomnancue saa^q jndaaⁿ seijndaa'ñê na nnto'ñooⁿya na nlui'n'maaⁿndyo. 8 Nquiee nn'aⁿ na cwiluiindyne n'iaaⁿ tsjoomnancue tîcalal'noⁿna cantyja 'naa^{n!} na luua' seijndaa'ñe Ty'oots'om. Ee xeⁿ jla'noⁿna na Jesú^s cwiluiiñê nquii na matsa'ntjom yuu na tjacyntyja na jeeⁿ neiⁿncoo', quia jo' tîxocaty'ioomna jom ts'oom'naaⁿ. 9 Na^{n!}ñeeⁿ tjoomna cha'xjeⁿ na matseineiⁿ ñ'oom' Ty'oots'om na teiljeii. Matsona':

Joo nn'aⁿ na jnda nquiu Ty'oots'om,

jnda seijndaa'ñê jndye nnom cwentaana na tjacantyja na ya na meiⁿjom tyoonty'iaa nn'aⁿ. Meiⁿ tyoondyena cantyja 'naaⁿ joo jo', majndeitiicheⁿ na nnc'oom' n'omna chiuu la'xmaⁿna'.

10 Nquii Espíritu Santo t'mooⁿ ñ'oommeiⁿ ndaaya, ee jom mal'uetcuuñê cha'tso, hasta ñ'oom na t'manti na matsei'noⁿ nquii Ty'oots'om.

11 Cantyja 'naaⁿ ts'aⁿ, ¿'ñeeⁿ nntsei'noⁿ chiuu m'aaⁿ ts'om cwiicheⁿ ts'aⁿ? Macandä nquii ntyjii. Maluaa' waa cantyja 'naaⁿ Ty'oots'om, macandä nquii Espíritu na cwiluiñê ntyjii chiuu m'aaⁿ ts'oom. **12** Jaa tyooto'ñooⁿya juu na m'aaⁿ n'om nn'aⁿ na tyoola'xmaⁿna cantyja 'naaⁿ Ty'oots'om. Jaa cwito'ñooⁿya Espíritu na mañequiaaⁿcha nndaña nla'noⁿa cha'tso na cwe'yu na mañequiaaⁿ na cwicandaaya. **13** Quia cwilanañaⁿyâ cantyja 'naaⁿ ñ'oommeiⁿ, cwiwil'uee'ndyô ñ'oom na ma'moⁿ Espíritu ndaayâ, nqueⁿ na cwiluiñê Ty'oots'om, nchii ñequio ñ'oom na cwit'mooⁿ nn'aⁿ cantyja na jndo' n'om nquiee. Ndo' na luua', cwiwil'uee'ndyô ñ'oom na matseijndaa'ñê Espíritu na cwit'mooⁿyâ ndaña nn'aⁿ na la'xmaⁿna jom.

14 Saq ts'aⁿ na ticaluiñê cwentaa' Ty'oots'om titsei'oom'ñê ñ'oom na matseijndaa'ñê Espíritu na cwiluiñê ee ndoo' ntyjii tsan'ñeeⁿ na cwe' ñ'oom na til'ue joona'. Ee manda ts'aⁿ na matseixmaⁿ cantyja 'naaⁿ Espíritu, juu nndaña nntsei'noⁿ. **15** Saq ts'aⁿ na matseixmaⁿ Espíritu nndaña nntsei'noⁿ ñ'oommeiⁿ, meiⁿ tjaa 'ñeeⁿ ts'aⁿ na wanaaⁿ na nntso na tixcwe mach'eeⁿ. **16** Ee ñ'oom' Ty'oots'om na teiljeii matsona': “¿'ñeeⁿ ts'aⁿ jndä sei'noⁿ chiuu na m'aaⁿ ts'om Nquii na cwiluiñê

na matsa'ntjom jaa? ¿'Ñeeⁿ ts'aⁿ nndaa^q nntseijndo^l ts'oom?" Sa^q jaa laxmaa^{ny}a juu na m'aa^{n!} ts'om Cristo.

3

*Cwiluiindyo nn'aⁿ na cwila'x'iaa'ndye ñ'eⁿ
Ty'oots'om*

¹ Cantyja 'na^{ny}a, 'o nn'a^{ny}a na cwila'yu'yo', tîcanda^qa^q nntseina^{ny}a ñ'oom cantyja 'naa^{n!} Cristo ndaa^q'yo' cha'xjeⁿ na ma'moⁿ ts'aⁿ juuna' ndaa^q nn'aⁿ na la'xmaⁿ Espíritu. Tca^{nna}' na nntseina^{ny}a juuna' ndaa^q'yo' na cha'cwijom cwiluiindyo' cantyja 'naa^{n!} tsjoomnancue, cha'cwijom ndaa^q yonch'uu. ² Ee yo'ndaa tileicanda^q nntquiina sei!. Joona macanda^q ndaatsuu' tsongyeena cwiwena. Maluaa' matseijomna' cantyja 'na^{n!} 'o. 'O tileicala'no^{n!}'yo' ñ'oom' Ty'oots'om na jndeitina', ee tyooquiee n'om'yo' cantyja 'naa^{n!}'aⁿ. Ndo' meiⁿ je' tileicala'no^{n!}'yo' ñ'oom'm na jndeitina'. ³ 'O ndicwaⁿ la'xma^{n!}'yo' cantyja 'naa^{n!} tsjoomnancue. Ee na cwila'tqa^q'n'om'yo' nc'iaa'yo' ndo' cwila'ntja'ndyo' ñ'eⁿndyena, ma'moⁿna' na tjaan na matseichuii'na' 'o ñequio nn'aⁿ na la'xmaⁿ cantyja 'naa^{n!}'na'. ⁴ Ee quia cwiindyo' 'o nntso: "Ja matseijomndyo cantyja 'naa^{n!} Pablo", ndo' cwiichenⁿ nntso: "Ja matseijomndyo cantyja 'naa^{n!} Apolos", ma'moⁿna' na la'xma^{n!}'yo' cha'xjeⁿ nn'aⁿ tsjoomnancue.

⁵ Ja Pablo ¿'ñeeⁿ cwiluiindyo? Ndo' ¿'ñeeⁿ cwiluiñe Apolos? Ñequii'cheⁿ cwiluiindyô nn'aⁿ na cwindya'ntjooⁿyâ nnom Jesucristo na cantyja 'naa^{ny}yâ jla'yu'yo' ñ'eⁿñê. Cwii cwiindyô ñel'aayâ ts'iaaⁿ na tquiaaⁿ ndaayâ.

6 Ts'iaaⁿ na s'aa matseijomna' cha'cwijom ts'aⁿ na manom'. Ndo' ts'iaaⁿ na s'aa Apolos matseijomna' cha'cwijom ts'aⁿ na matseicandaa' ntjom. Saq nquii Ty'oots'om mach'eeⁿ na tjaanajndeii ts'iaaⁿ'ñeeⁿ. ⁷ Ndo' na luua', meiⁿ juu ts'aⁿ na manom' tit'maⁿ cwiluiiñe, meiⁿ ts'aⁿ na matseicandaa'. Nquii Ty'oots'om t'maⁿ cwiluiiñe ee jom mach'eeⁿ na wjaanajndeii ts'iaaⁿ'ñeeⁿ. ⁸ Juu ts'aⁿ na manom' ñequio ts'aⁿ na matseicandaa', ñe'cwii xjen cwiluiindyena. Ndo' nquii Ty'oots'om nntioml'uaaⁿ ts'aⁿ cantyjati na jndä ñejndi'ntjom nnoom. ⁹ Ee já cwe' cwila'xmaaⁿyâ nn'aⁿ na cwilajomndyô ts'iaaⁿ'naaⁿ Ty'oots'om, ndo' 'o la'xmaaⁿ'yo' tyuaaⁿaⁿ, la'xmaaⁿ'yo' cha'cwijom w'aa na mach'eeⁿ. ¹⁰ Cantyja 'naaⁿ'na', ja cwiluiindyô cha'cwijom lúañetquiee na seijndaa'ñe Ty'oots'om na maquaⁿ tsiaⁿtsjo' ndo' cwiicheⁿ ts'aⁿ matseicandaaⁿ'ñe w'aa nacjoo' juuna'. Saq cwii cwii ts'aⁿ queⁿñe cwenta cantyja 'naaⁿ ts'iaaⁿ na mach'ee. ¹¹ Ee tjaa 'ñeeⁿ ts'aⁿ na nndaaⁿ nlqueⁿndyô cwiicheⁿ ts'iaaⁿtsjo' ñequio tsiaⁿtsjo' na waa, na juu jo' tseixmaaⁿa' Jesucristo. ¹² Saq tiñe'cwii nnom 'naⁿ na cwileil'uee'ndye nn'aⁿ na cwil'a ts'iaaⁿ nacjoo' tsiaⁿtsjo'ñeeⁿ. Ee ts'aⁿ na xcwee'ya ts'om na mandi'ntjom nnom Ty'oots'om, matseijomna' ts'iaaⁿ na mach'eeⁿ cha'cwijom cwii w'aa na cwiluiina' ñ'eⁿ s'om cajaⁿ, oo ñ'eⁿ s'om xuee, oo ñ'eⁿ ljo' na jeeⁿ jndä. Saq ts'aⁿ na tixcwee' ts'om na mandi'ntjom nnom Ty'oots'om, matseijomna' ts'iaaⁿ na mach'eeⁿ cha'cwijom cwii w'aa na cwiluiina' ñ'eⁿ n'oome, oo ñ'eⁿ neiiⁿ'jndä, oo ñ'eⁿ n'oomljooto'. ¹³ Juu xuee quia na nncu'xeⁿ

Ty'oots'om nn'aⁿ, nleitquoo'ya chiuu tseixmaⁿ ts'iaaⁿ na tyoch'ee cwii cwii ts'aⁿ. Juu xuee'ñeeⁿ t'maⁿ chom nncuaa, jo' jo' m'mooⁿna' chiuu tseixmaⁿ ts'iaaⁿ na tyoch'ee cwii cwii ts'aⁿ. ¹⁴ Jo' chii xeⁿ tilco ts'iaaⁿ na tyoch'ee ts'aⁿ, waa naya na nlo'ñoom cantyja 'naaⁿ ts'iaaⁿ na jndä ñes'aaⁿ. ¹⁵ Saä xeⁿ nlco ts'iaaⁿñeeⁿ, nntsuuñê cantyja 'naaⁿ juuna'. Nqueⁿ nlui'n'maaⁿñê, saä cwe' ñetomti jo'. Ndo' na luala' nntjoom nntseijomna' cantyja 'naaⁿaⁿ cha'cwijom na nc'uaa' chii jluii'ñê naquii' chom.

¹⁶ ¿Aa ticaliu'yo' na 'o cwiluiindyo' waa' Ty'oots'om ndo' na m'aaⁿ Espíritu Santo naquii' n'om'yo'? ¹⁷ Xeⁿ na m'aaⁿñeeⁿ juu na nntseityuui' waa' Ty'oots'om, nntseityueeⁿeⁿ tsan'ñeeⁿ ee lju' cwiluiiñe juuna', ndo' mancjo'yo' cwiluiindyo' w'aa'ñeeⁿ.

¹⁸ Mei'ncwiindyo' 'o tinquiu'nn'aⁿñe cheⁿquii cantyja 'naaⁿ ñ'oomwaa'. Xeⁿ m'aaⁿñeeⁿ ts'aⁿ quii'ntaaⁿyo' na matseitiuu na jndo^o ts'om cha'xjeⁿ nquiee nn'aⁿ tsjoomanancue cwitjeii'na cwenta, c'oome juu cha'na ts'aⁿ na meinchjoo tijndo^o ts'om, cha mayuu'cheⁿ nntseixmaaⁿ ts'aⁿ na jndo^o ts'om. ¹⁹ Ee juu na cwitjeii' nn'aⁿ tsjoomnancue cwenta na jndo^o n'omna, Ty'oots'om macwjeeⁿeⁿ cwenta na ntjeiⁿ jo'. Ee waa ñ'oom'm na teiljeiina' na matsona': "Nnt'uui Ty'oots'om nn'aⁿñequio mañejuu na jndo^o n'omna". ²⁰ Ndo' waa cwiicheⁿ ñ'oom'm na teiljeii na matsona': "Nqueⁿ na cwiluiiñê na catsa'ntjoom jaa mantyjeeⁿ joo ñomtiuu 'naaⁿ nn'aⁿ na jeeⁿ jndo^o n'om, cwe' ts'iaaⁿndyo joona!" ²¹ Nc'e na ljo', tintjei's'andyo'

na majndaa' ts'aⁿ na cwilajomndyo' ñ'eⁿñé. Ee cha'tso na matseijndaa'ñé Ty'oots'om la'xmaⁿna' cwenta'yo'. ²² Meiiⁿ nnc_o Pablo, oo nquii Apolos, oo nquii Pedro, cha'tsondyô cwiluiindyô na cwindya'ntjoo'nyâ ndaa'yo!. Ee cha'tso na s'aa Ty'oots'om m'aaⁿna' cwentaaya. Cantyja na cwitando_o'a tsjoomnancuewaañe matseixmaⁿna' naya 'naaⁿya ee na cwito'ñoo'nyâ na cwitando_o'a ñ'eⁿñé. Mati cantyja na cwiwjaaaya matseixmaⁿna' naya 'naaⁿya, nc'e cantyja 'naaⁿ! jo' cwitsaaqui_a'a cañoom'luee. Cha'tso na cwiwinoⁿya je' ñequio na quia wjaawe'cañoomna' cwila'xmaⁿna' na nnteijndeina' jaa. ²³ Ndo' o m'aⁿyo' cwentaa' Cristo ndo' jom cwiluiñé cwentaa' Ty'oots'om.

4

Ts'iaaⁿ na maty'iom Jesucristo apóstoles

¹ Jo' chii catjei'yo' cwenta cantyja 'naaⁿya na cwiluiindyô nn'aⁿ na cwindye'ntjom nnom Cristo, ndo' na cwit'mo_o'nyâ ndaa_q nn'aⁿ ñ'oom' Ty'oots'om na wanty'iuu' tyom'aⁿna'. ² Juu ts'aⁿ na waa cwii ts'iaaⁿ na matseixmaⁿ, macaⁿna' na cwitquioo' cantyja 'naaⁿna' na cwiluiñé ts'aⁿ na matseicanda_q. ³ Saa_q cantyja 'naⁿya, ticwjaa'ndyo cwenta chiuu waa na 'o cwitjei'yo' cwenta cantyja 'naaⁿ! ts'iaaⁿ na matseixmaⁿya oo chiuu nquiu nt'omcheⁿ. Mein ticus'xaⁿ cheⁿnnc_o cantyja 'naⁿya. ⁴ Juu na m'aaⁿ! ts'ooⁿ tica'moⁿna' aa waa na matseitjoondyo, saa_q meiiⁿ na ljo' tica'moⁿna' na tjaa jnaⁿya. Nquii Ty'oots'om nncu'xeeⁿ ja. ⁵ Nc'e na luala', cwitjoochen na nncwjee'nnda' Ta

Jesús, tintjei'yo' cwenta cantyja 'naaⁿ nn'aⁿ na cwindye'ntjom ndaq^a'yo'. Ee xjeⁿñeeⁿ nnts'aaⁿ na nleitquioo'ya 'naⁿ na cwe' wanty'iuu' cwil'a nn'aⁿ ñequioo joo 'naⁿ na cwila'jndaa'ndyena naquii' n'omna. Quia jo' nñequiaa Ty'ooots'om nnom cwii cwii ts'aⁿ cha'xjeⁿ na matsona'.

6 'O nn'a^{nya} na cwila'yu'yo', matseina^{nya} ñ'oommeiⁿ ndaq^a'yo' cantyja 'na^{nya} ñ'eⁿ Apolos cha nnteijndeina' 'o, ndo' cha cantyja 'naa^{nya} nntsaala'nqⁿ'yo' na tincwinom'yo' ñ'oom na teiljeii, ndo' cha meiⁿcwii ts'aⁿ tincwji's'aaⁿ cwii ts'aⁿ na mañequiaa ñ'oom! Ty'ooots'om cha nnts'aana' na tictwentyjo 'naaⁿ cwiichenⁿ. **7** Ee ¿chiuu waa cantyja 'naⁿ na mach'een^a ntyji' na jndandyu'ti' nchiiti cwiichenⁿ? Ndo' ¿cwaanⁿ cwii nnom na matsei'xmaⁿ na nchii nquii Ty'ooots'om mañequiaaⁿ na matsei'xmaⁿ jo'? Ndo' xeⁿ cwe' jnda' naya'ñeeⁿ, ¿chiuu na matseis'andyu' na cha'cwijom tiyuu' na jnda' juuna'?

8 Mach'een^a na nquiu'yo' na la'xmaⁿ'yo' nn'aⁿ na tyandye. Cha'cwijom tjaa meiⁿcwii na macaⁿtina' 'o. Cha'cwijom na cwiluiindyo' nn'aⁿ na cwitsaⁿntjom, meiiⁿ na ticañ'q^anyâ. Toom cwe' na mayuu' cwiluiindyo' nn'aⁿ na cwitsaⁿntjom cha mati já nla'jomndyô jo' ñ'eⁿndyo!. **9** Mach'een^a ntyjii na maqueⁿ Ty'ooots'om já apóstoles na wanty'iaa'ndyotaayâ na cha'tsondye nn'aⁿ. Matseijomna' cantyja 'naa^{nya} cha'cwijom nn'aⁿ na jnd^a teijndaa' na nncwje na jndoo'cheⁿ nn'aⁿ ndo' nnty'iaa ángeles. **10** Cwitjeii' nn'aⁿ cwenta na já na cwiñequiaayâ ñ'oom cantyja 'naaⁿ Cristo la'xmaa^{nya} nn'aⁿ na ntjeiⁿndye sa^a 'o cwitjei' cheⁿncjo'yo' cwenta na la'xmaⁿ'yo' na jeeⁿ jndo'

n'om'yo' cantyja 'naaⁿ'aⁿ. Cwitjei'yo' cwenta na tileicjaanjoom' cwil'aayâ s̄aq 'o jeeⁿ cwijaanjoom' cwil'a'yo'. Cwila't'maaⁿ'ndye nn'aⁿ 'o s̄aq jâ ticuee' n'omna. ¹¹ Hasta xjeⁿ je', waa xjeⁿ na matseitjoona' na nntquiaayâ ndo' na nncwaayâ ñequio liaa na nlcw̄aq'â. Jndye ndii' cwicachoo^q'â, ndo' meiⁿ tjaa'naⁿ w'aaya. ¹² Cwiwijndyaayâ na cwil'aayâ ts'iaaⁿ. Quia cwitioo nn'aⁿ ñ'oomwi' cjoojyâ, cwitaanyâ na catio'naaⁿñ'e Ty'oots'om joona. Quia cwileintyjona jâ, cwila'quii n'ooⁿyâ. ¹³ Quia cwila'neiⁿ nn'aⁿ ñ'om t̄aq' ts'om nacjooyâ, cwila'joom'na jâ cha'cwijom to' na niom nnom tsjoomnancue s̄aq cwit'ooⁿyâ ñequio ñ'oom ya. Hasta xjeⁿ je' cwil'a nn'aⁿ na cwila'xmaaⁿyâ cwii na jeeⁿ ts'iaaⁿ.

¹⁴ Nchii cwe' matseiljeiya ñ'oommeiⁿ cha catsejnaaⁿ'na 'o s̄aq cha na nntseijndo'na' n'om'yo' nc'e na cwiluiindyo' ntseindaaya na jeeⁿ wi' ts'ooⁿya 'o. ¹⁵ Ee meiiⁿ na aa m'aⁿ qui meiⁿ nn'aⁿ na cwit'mooⁿna cantyja 'naaⁿ Cristo ndaq'yo', s̄aq ti-jndye lotye'yo' m'aⁿ. Cantyja 'naaⁿ na cwila'yú'ya n'om'yo' ñ'eⁿ Ty'oots'om, ja cwiluiindyo' tsotye'yo' nc'e ñ'oom naya na macwjí'i'n'maaⁿñ'e nn'aⁿ. ¹⁶ Jo' chii matseijndo'a n'om'yo', cal'a'yo' cha'xjeⁿ na quits'aaya.

¹⁷ Jo' chii majñooⁿya Timoteo na m'aⁿ'yo', cwiluiiñ'e jndaaya na jeeⁿ matseicañaaⁿ ndo' na jnda ntyjiiya jom, jom nnts'aaⁿ na nncjaañjoom' n'om'yo' chiuu waa na jom'aaⁿ na matseixmaⁿya cwentaa' Cristo Jesús cha'xjeⁿ na ma'mooⁿ ndaq' nn'aⁿ cwii cwii tmaaⁿ nn'aⁿ na macwjeeⁿeⁿ cwentaaⁿ'aⁿ. ¹⁸ Ñ'eeⁿndyo' 'o na cwilas'andyo'

cheⁿncjo'yo' na cwindu'yo' na tixocjonty'iannda'a 'o. ¹⁹ Saq tyuaa' nncjocando'o'a 'o xeⁿ l'ue ts'om Ta Jesús, ndo' quia ljo'chen nljeiya chiuu n'om naⁿñeeⁿ na luala' cwil'ana, nljeiya chiuu tseixmaⁿ ñ'oom na cwila's'andyena. ²⁰ Ee juu na ma'lmoⁿna' na matseixmaⁿ ts'aⁿ na matsaⁿntjom Ty'oots'om jom, xocwitquioo' jo' cwe' nc'e ñ'oom na matseineiⁿ ts'aⁿ, nleitquioo' jo' cantyja 'naaⁿ' na aa matseixmaaⁿ najndeii na cwiluiñe Ty'oots'om. ²¹ ¿Chiuu nl'ue n'om'yo' na cats'aa? ¿Aa nncjocando'o'a 'o na nntseitia'a 'o, oo aa nnc'ooⁿya na wi' ts'ooⁿya 'o, ñequio na jeeⁿ jnda ntyjiya 'o?

5

Catjei'yo' ts'aⁿ na m'aar'ya ñ'eⁿ cwiicheⁿ yuscu

¹ Waa ñ'oom na cwiindyoⁿ 'o mañ'oom tsondyee t'maⁿndo' na ljo' meiⁿ nn'aⁿ na tyoola't'maaⁿndye Ty'oots'om tiquil'ana na luala'. ² Ndo' 'o cwitjei' cheⁿncjo'yo' cwenta na jeeⁿ cwila'candaⁿndyo' meiⁿ tatiato nquiu'yo' na luala' waa. Matsona' na catjei'yo' tsaⁿñeeⁿ quii'ntaaⁿyo' na luala' mach'eeⁿ. ³ Meiiⁿ na tic'ooⁿndyoⁿ ñ'eⁿndyo', saq cantyja 'naaⁿ' espíritu 'naⁿya m'aaⁿya ñ'eⁿndyo', ñequio xuee' Ta Jesucristo jnda tu'xaⁿya ts'aⁿ na luala' mach'ee. ⁴ Quia cwitjomndyo' na nla't'maaⁿndyo' Ty'oots'om ja nnc'ooⁿya ñ'eⁿndyo' cwe' cantyja 'naaⁿ' espíritu 'naⁿya ndo' mati ñequio juu najndeii na matseixmaⁿ Ta Jesús nnc'oomnaⁿ ñ'eⁿndyoⁿ. ⁵ Ndo' na luala', la'xmaⁿyo' na catio'yo' tsaⁿñeeⁿ l'q Satanás cha cwi'ndaa' seiiⁿeⁿ saq nlui'n'maaⁿñe espíritu 'naaⁿaⁿ quia na nncwjee'nnda' Ta Jesús.

6 Tixcwe na cwitjei'yo' cwenta na jeeⁿ cwila'candaq'a'ndyo' jo nnom Ty'oots'om ndo' na cwiljoya n'om'yo' na luua' waa quii'ntaaⁿ'yo'. ¿Aa ticaliu'yo' na meiiⁿ ñechjoowi' ndaaljo' matseicandeii'na' cha'waa tsqueentyoo'? **7** Jo' chii catjei'ndyo' cantyja 'naaⁿ' cha'tsoñ'eⁿ na la'xmaⁿna' ndaaljo' tquie na matsei'ndaa'na' 'o cha nntseijomna' 'o tyoo' na tuiina' ñ'eⁿ tsqueentyoo' xco na tjaan daaljo' tjaquiee' na cwicwa' nn'aⁿ judíos xuee Pascua, na juu tyoo'ñeeⁿ cwiluiindyo'. Ee Cristo cwiluiiñê Catsmaⁿ chjoo cwentaaya cantyja 'naaⁿ' xuee Pascua 'naaⁿya. Jla'cuee' nn'aⁿ jom ndo' tueeⁿeⁿ cwentaaya. **8** Jo' chii matsona' na calajomndyo xuee Pascua ñequio na xcwee' n'ooⁿya ndo' na mayuu'a, na joo jo' la'xmaⁿna' cha'cwijom tyoo' na tjaan daaljo' tjaquiee'. Nchii nlajomndyo xuee Pascua'ñeeⁿ ñequio ndaaljo' tquie na tseixmaⁿna' na quie' n'ooⁿya ndo' natia na cwil'aaya.

9 Ñequio cwiicheⁿ carta'ñeeⁿ tsjooya na tilajomndyo' ñequio nn'aⁿ na cwe' m'aⁿya ñequio nt'omcheⁿ nn'aⁿ. **10** Saa ñ'eⁿ carta'ñeeⁿ nchii ñe'catsjooya na catjei'ndyo'ñ'eⁿ'yo' ñequio nn'aⁿ tsjoomnancue na cwe' m'aⁿyana ñequio nn'aⁿ oo na m'aⁿna na cwila'queen n'omna 'naaⁿ' cwiicheⁿ ts'aⁿ, oo na jeeⁿ ya cwinquio'nn'aⁿna nc'iaana cha nnadaa ntjeii'na 'naaⁿ naⁿ'ñeeⁿ oo ñ'eⁿ joo nn'aⁿ na cwila't'maaⁿndye 'naⁿ na cwe' nn'aⁿ l'a. Ee xeⁿ tilajomndyo' ñequio nn'aⁿ na laxmaⁿ nmeiⁿ, nlcaⁿna' na calui'yo' tsjoomnancue. **11** Ñ'oom na l'ue ts'ooⁿ na cala'noⁿ'yo' cantyja 'naaⁿ' carta'ñeeⁿ, ts'aⁿ na

matso na matseiyu' ñ'eⁿ Jesucristo, meiⁿchjoo tilajomndyo' ñ'eⁿñê xeⁿ m'aanⁿyaⁿ ñ'eⁿ ts'aⁿ na cwe' luala'ndyo', oo queeⁿ ts'oom 'naaⁿ' cwiicheⁿ ts'aⁿ, oo matseit'maaⁿñê 'naaⁿ na cwe' nn'aⁿ l'a, oo cantuñê, oo tsaⁿ candii jom, oo mach'ueeⁿ. Meiⁿ na nlcwa' ñequio ts'aⁿ na matseixmaⁿ nmeiⁿ til'a'yo'. ¹² Titseixmaⁿya na nncu'x^any^a nn'aⁿ na tyoola'yu'. Ncjo'yo' la'xmaⁿyo' na nntu'xeⁿyo' nn'aⁿ na m'aⁿ quii'ntaaⁿyo'. ¹³ Nquii Ty'ooots'om nncu'xeeⁿ nn'aⁿ na tyoola'yu'. Quia jo' catjei'yo' ts'aⁿjnaⁿñeeⁿ quii'ntaaⁿyo'.

6

*Ticaty'iomyana' na nlqua^aya ñ'oom cjoon*ci'aaya**

¹ Quia cwiindyo' 'o waa ñ'oom na malein'oomna' juu ñequio cwiicheⁿ x'iaa' na matseiyu', ¿chiuu na cwiqueⁿyo' ñ'oom tsaⁿñeeⁿ jo nnom jwe na nchii ts'aⁿ na matseiyu'? Cwa nchii ncjo'yo' na cwila'yu'yo' ñ'eⁿ Ty'ooots'om nla'jndaa'ndyo' ñ'oom'ñeeⁿ. ² ¿Aa ticaliu'yo' na joo nn'aⁿ na cwiluiindy^e cwentaa' Ty'ooots'om nntu'xeⁿna nn'aⁿ tsjoomancue? Ndo' nc'e na nntu'xeⁿyo' nn'aⁿ tsjoomnancue, ¿chiuu na tileicandaa^a nntu'xeⁿyo' ñ'oommeiⁿ na cwe' cwantindyo joona'? ³ ¿Aa ticaliu'yo' na nntu'x^any^a ángeles? Ndo' nc'e na ljo', majndeiiiticheⁿ nnda^a nla'jndaa'ndyo' ñ'oom na mat'uiina' jaa yuu na ticjaañjoom' na cwil'aaya je'. ⁴ Jo' chii xeⁿ niom ñ'oom na maleichuuna' 'o ñequio nn'aⁿyo' na cwilayu', caty'iom'yo' ts'iaaⁿñeeⁿ nn'aⁿ quii'ntaaⁿyo' na tit'maⁿ la'xmaⁿ

na catu'xeⁿna ñ'oom 'naⁿ'yo'. ⁵ Matsjoo na luaa' cha catseijnaaⁿna' o'. ¿Aa nnts'aacheⁿna' na tjaa'naⁿ meiⁿñecwii ts'aⁿ quii'ntaaⁿ'yo' na jndoⁿ ts'om na nntseijndaa'ñê ñ'oom na maleichuuna' o? ⁶ ¿Aa maxjeⁿ maty'iomyana' na cwiqueⁿ'yo' ñ'oom cjoo' cwii nn'aⁿ'yo' na mati matseiyu'? Jo' chii cwitjomndyo' jo ndaq nn'aⁿ na cwitu'xeⁿ ñ'oom, meiiⁿ na joona nchii nn'aⁿ na cwila'yu'.

⁷ Juu na cwila'ntja'ndyo' ñequio nc'iaa'yo' na cwila'yu' ma'moⁿna' na t'maⁿ waa na cwila'tjoondyo'. Yati caljoya n'om'yo' nawi' na cwil'ana 'o, meiiⁿ na cwinty'ueena 'naⁿ'yo'. ⁸ Saa 'o xuii' na cwil'a'yo', mancjoondyo' cwita'wi'yo' nn'aⁿ'yo' na cwila'yu' hasta cwinty'uee'yo' 'naaⁿna. ⁹ ¿Aa ticaliu'yo' na joo nn'aⁿ na cwiñequiandye cantyja 'naaⁿ' natia ticalaxmaⁿna cantyja na matsa'ntjom Ty'oots'om? Tiñe'quio'nn'aⁿndyo' cheⁿncjo'yo' cantyja 'naaⁿ' ñ'oomwañañe. Nn'aⁿ na cwe' cwitjomndyeyana ñ'eⁿ nn'aⁿ na tyoo'uncona, tixocala'xmaⁿna cantyja na matsa'ntjom Ty'oots'om, meiⁿ nn'aⁿ na cwila't'maaⁿndye 'naⁿ na cwe' nn'aⁿ l'a, meiⁿ nn'aⁿ na cwe' m'aⁿya ñ'eⁿ nn'aⁿ, meiⁿ naⁿnom na cwe' ñ'eⁿ ntyjenom m'aⁿ, ¹⁰ meiⁿ nn'aⁿ na cwinty'uee, meiⁿ nn'aⁿ na queen n'om 'naaⁿ' cwicheⁿ ts'aⁿ, meiⁿ naⁿcandyee, meiⁿ nn'aⁿ na cwitioñ'oom nn'aⁿ, meiⁿ nn'aⁿ na cwinquio'nn'aⁿ ts'aⁿ cha nnndaq ntjeii'na 'naaⁿaⁿ. ¹¹ Ñ'eeⁿndyo' 'o na ñejla'xmaⁿ'yo' nmeiⁿ cwitjoochen na nla'yu'yo', saa je' jndaq tmaⁿndyo', jndaq tqueⁿndyo Ty'oots'om 'o, jndaq tqueen 'o na tjaa jnaⁿ la'xmaⁿ'yo' ñequio xuee' Ta Jesucristo ndo' cantyja 'naaⁿ' nquii

Espíritu na cwiluiiñe Ty'oots'om cwentaaya.

Maque"lju' Ty'oots'om seii' ts'a"

12 Waa ñ'oom na cwilue nn'aⁿ: “Wanaaⁿ na nnts'aa meiⁿljo'chenⁿ na l'ue ts'ooⁿ”. Mayuu' na ljo', saa^a ticha'tso mateijndeiiina' ts'aⁿ. Ñ'oom na mayuu' wanaaⁿ na nnts'aa yuu na l'ue ts'ooⁿ saa^a ticatsona' na cwii na mats'aa nlqueⁿna' xjeⁿ 'naaⁿna' ja. **13** Mati cwilue nn'aⁿ: “Juu nantquie tseixmaⁿna' cwentaa' tsiaa' ts'aⁿ, ndo' tsiaa' ts'aⁿ tseixmaⁿna' cwentaa' nantquie.” Ñ'oom na mayuu' jo', saa^a we nnom nmeiⁿ nnts'aa Ty'oots'om na nndyuena'. Sa^a nchii tqueenⁿ seii' ts'aⁿ na cwe' luua' nnc'oom ñ'eⁿ cwiicheⁿ ts'aⁿ, tqueenⁿ seii'a na laxmaⁿna' cwentaa' nqueⁿ na matsa^antjoom, ndo' jom m'aaⁿ cwentaa' seii'a. **14** Ndo' cha'xjeⁿ na tquiaaⁿ na wando'xco Jesús mati nñeⁿequiaaⁿ na nntandoⁿoⁿxcooya nc'e najndeii na cwiluiiñe.

15 ¿Aa ticaliu'yo' na juu seii'yo' laxmaⁿna' cwii taⁿ seii' Cristo? ¿Aa maty'iomna' na nntseitjooⁿ a juuna' ñ'eⁿ cwii yuscu na cwe' luua' m'aaⁿ ñ'eⁿ nn'aⁿ? Meinchjoo ticaty'iomna'¹⁶ ¿Aa ticala'noⁿyo' quia na matseitjoom'ñe ts'aⁿ ñequio sculjaa', ñe'cwii sei' laxmaⁿna? Ee ñ'oom' Ty'oots'om na teiljeii matsona': “Wendye joona, ñe'cwii sei' la'xmaⁿna.” **17** Ndo' na luua' waa, quia na matseijomñe ts'aⁿ ñequio Ta Jesús, ñe'cwii cwiluiiñe tsaⁿñeeⁿ ñ'eⁿñê.

18 Cha'cwijom na jndeii maleinom ts'aⁿ cha na ticat'uii cwii na teincuu' jom, maluaa' cal'a'yo' na tic'om'ya'yo' ñ'eⁿ ts'aⁿ na cwe' luua'. Ee nt'omcheⁿjnaⁿna mach'ee ts'aⁿticat'uiina' seiiⁿeⁿ,

saa ts'aⁿ na matseitjoom'ñe ñ'eⁿ cwiichenⁿ ts'aⁿ na cwe' luala', matseicw'aa'ñe jnaⁿ seiiⁿeⁿ. ¹⁹ ¿Aa ticaliu'yo' na cwiluiiñe seii'yo' wats'om cwentaa' Espíritu Santo na m'aanⁿ quii' n'om'yo' na jnda tquiaa Ty'ooots'om na c'oom ñ'eⁿndyo'? Jo' chii ticalaxmaⁿ'yo' na nñequiandyo' na nl'a seii'yo' yuu na queenⁿ n'omna'. ²⁰ Ee jnda seijnda Ty'ooots'om 'o ñequio cwii na jeeⁿcheⁿ ndya' jnda. Jo' chii laxmaⁿ'yo' na calal't'maaⁿndyo' jom ñequio seii'yo' ñequio espíritu 'nan'yo' ee na we ndii' joona' la'xmaⁿna' cwentaaⁿaⁿ.

7

Ñ'oom cantyja 'naaⁿ nn'aⁿ na jnda t'unco

¹ Ndo' je' maw'ø ñ'oom na cwita'x'e'yo' noogⁿ nacjoo' carta na jla'cwanom'yo'. Ñecuaa meiiⁿ ticoco tsans'a, ² saaⁿ jnaanⁿ na jeeⁿ cwe' luala' cwic'eenⁿ nn'aⁿ ñ'eⁿ nc'iaana, jo' chii yati cwii cwii tsans'a cocoom ndo' mati cwii cwii tsanscu c'oom saanⁿaⁿ. ³ Nquii tsans'a waa cwii nnom na matseixmaaⁿ na nnts'aaⁿ ñ'eⁿ scoom'm ndo' mati tsanscu waa cwii nnom na matseixmaaⁿ na nnts'aaⁿ ñ'eⁿ saanⁿaⁿ. Wendyena quiandye ntyjeena ndaqana na cala'candaⁿndyena ñ'oomwaa!. ⁴ Tsanscu tit-seixmaaⁿ na nntseintycwii'ñe nnom saanⁿaⁿ ee saanⁿaⁿ tseixmaⁿ cwenta jom, meiⁿ tsans'a tit-seixmaaⁿ na nntseintycwii'ñe nnom scoom'm ee scoom'm tseixmaⁿ cwenta jom. ⁵ Cwe' jo' tint-seintycwii'ñe ts'aⁿ nnom saanⁿaⁿ, nnom scoom'm saaⁿ ñequii'cheⁿ wanaanⁿ na nla'ljondyo' xeⁿ waa ñ'oom na jnda t'maⁿ'yo' na ñe'calaneiⁿ'yo' nnom Ty'ooots'om. Saⁿchii na jndye xuee, tints'aana' na

tileicala'quii n'om'yo' ndo' na ljo' nnts'aa Satanás na nla'tjooñdyo'!

⁶ Luua' waa na matsjoo cantyja 'naaⁿ' ñ'oomwaa', saq tintjei'yo' cwenta na tseixma'na' ñ'oom na matsa'ntjomna'. ⁷ Cantyja 'na'nya toom cwe' cha'tso naⁿnom laxma'na cha'na ja, saq tiñe'cwii xjeⁿ na mañequiaa Ty'oqts'om na laxmaa'nya. Ee ñ'eeⁿ nn'aⁿ waa cwii nnom na la'xmaⁿ, ndo' nt'omcheⁿ cwiichen ljo la'xmaⁿ.

⁸ Ndäq joo naⁿnom na tyoo'unco ndo' mati joo yolcu na jndä ljondye, matsjoo na yati caljoo'ndyena na ñenquieena cha'na m'aaⁿ ja lualañe. ⁹ Saq xeⁿ tileicwiquii n'omna na m'aⁿ ñenquieena, ñecuaa, c'unconaa, ee yati na m'aaⁿ ts'aⁿ na we caⁿ, nchiiti na cwe' matseiqueeⁿ ts'oom na ñe'c'oom ñ'eⁿ ts'aⁿ.

¹⁰ Saq ndäq 'o na jndä tma'co'yo', luua waa ñ'oom na matsa'ntjomna', nchii cwe' ñ'oom 'ndyo ja, ñ'oom 'ndyoo nquii Ta Jesús jo': juu scuu' ts'aⁿ ticatoⁿ'ñê ñequio saaⁿ'aⁿ. ¹¹ Saq xeⁿ ma'ñeeⁿ saaⁿ'aⁿ, ticwanaaⁿ na ncoconnaaⁿ'aⁿ, matsona' na caljoyaandyennda'na. Ndo' mati juu saaⁿ'aⁿ, tintseityuii' ljeii 'naaⁿna.

¹² Ndäq nt'omndyo' 'o na jndä t'unco'yo', luua matsjoo nnco, nchii matsa'ntjom Ta Jesús na caluii na ljo', xeⁿ na m'aaⁿ ts'aⁿ na matseiyu' saq scoom'm tyootseiyu' ndo' tsaⁿ'ñeeⁿ cwiljoya ts'om na m'aaⁿ ñ'eⁿñê, tintoⁿ'ñê ñequio scoom'm. ¹³ Ndo' cwii yuscu na matseiyu', xeⁿ saaⁿ'aⁿ tyootseiyu', saq cwiljoya ts'om na cwiljoo'ñe ñ'eⁿñê, tintseityueeⁿ ljeii na tocoom ñ'eⁿñê. ¹⁴ Ee maqueⁿndyoo Ty'oqts'om saa' yuscu na tyootseiyu' nc'e na cwiluiiñê saa' yuscu na matseiyu'.

Ndo' mati maque^{nñooq} scuu' ts'aⁿ na tyootseiyu'
 nc'e saan^an tseixmaⁿ ts'aⁿ na matseiyu'. Ee xeⁿ
 nchii na luala' waa, quia jo' nda joona nla'xmaⁿ
 cha'na nda nn'aⁿ na tyoola'y^u', s^{aq} na mayuu'
 maqueⁿna' nda joona cantyja 'naaⁿ tmaaⁿ cwen-
 taa' Ty'ooots'om. ¹⁵ S^{aq} xeⁿ juu ts'aⁿ na tyootseiyu'
 ñe'catseityueeⁿeⁿ ljeii na tocoom ñ'eⁿ saan^an oo
 scoom'm, quia jo' ñecuaato na ca'ñeeⁿ. Quia na
 luala' waa maxjeⁿ til'aaya na jndeⁱna' na caljoo'ñe
 ts'aⁿ. Ee Ty'ooots'om l'ue ts'oom na ticach^{ooya} tia'
 ñequio nn'aⁿw'aaya. ¹⁶ Ee ¿chiuu ntyji'y^u' u tsan^scu
 na matsei'y^u' na jnd^a tma'co' na xocatsei'y^u' sa'
 ñ'eⁿ Ty'ooots'om cantyja 'naⁿ? Ndo' mati 'u tsan^sa
 na matsei'y^u' na jnd^a tma'co', ¿chiuu ntyji'y^u' na
 xocatseiyu' scu' cantyja 'naⁿ?

Tilajndaaya na nlachuii'a na tyolaxmaa'ya

¹⁷ Ticwii cwiindyo' 'o, caljoya ts'om chiuu waa
 na jnd^a tqiiaa Ty'ooots'om na matseixmaⁿ quia na
 t'maaⁿ juu. Luala' waa ñ'oom na mañequiaaya ndaa
 nn'aⁿ cha'tso ntmaaⁿ nn'aⁿ na macwjeen^en cwen-
 taaⁿaⁿ. ¹⁸ Quia na t'maaⁿ 'u, ¿aa jnd^a tuii 'naaⁿ sei'
 cha'xjeⁿ cwil'a nn'aⁿ judíos yonom ndana? Tintse-
 ichui' na luala' waa. Ndo' xeⁿ aa tyooluii 'naaⁿ sei'
 quia na t'maaⁿ 'u, tacan^ana' na caluii na ljo'. ¹⁹ Ee
 ticateijndeⁱna' ts'aⁿ xeⁿ na tuii 'naaⁿñeeⁿ tjaaⁿaⁿ
 meiiⁿ xeⁿ ticaluiina'. Ñ'oom na jndati na catse-
 icanda ts'aⁿ ñ'oom na matsa'ntjom Ty'ooots'om.
²⁰ Jo' chii meiⁿquia cwii nnom na matseixmaⁿ ts'aⁿ
 quia na t'maⁿ Ty'ooots'om jom, jo' jo' caljoya ts'oom.
²¹ ¿Aa cwiluiindyu' ts'aⁿ na mandi'ntjomtyeⁿ quia
 na t'maaⁿ 'u? Tinc'oom' ts'om' na ljo', s^{aq} xeⁿ
 nncju'naaⁿñena' na nndyaandyu', cwa catsa' na

ljo'. **22** Ee ts'aⁿ na m'aaⁿ na mandi'ntjomtyeⁿ quia na t'maⁿ Ty'oots'om jom na catseiyoom'm ñ'eⁿ Ta Jesúś, je' cwiluiiñe ts'aⁿ na jnda seicandyaa'ñé. Ndo' maljoyu cantyja 'naaⁿ' ts'aⁿ na m'aaⁿ xjeⁿ 'naaⁿ' quia na t'maⁿ Cristo jom, je' cwiluiiñé ts'aⁿ na mandi'ntjomtyeⁿ nnoom. **23** Juu ñequio na seijnda Ty'oots'om 'o, jeeⁿ ndya' jnda jo'. Jo' chii tiñeiquiandyo' na laxmaⁿ'yo' nn'aⁿ na cwindye'ntjomtyeⁿ ndaaⁿ nn'aⁿ. **24** Quia jo' 'o nn'aⁿya, cwii cwiindyo' caljoya ts'om chiuu waa na tyotseixmaⁿ xjeⁿ na t'maⁿ Ty'oots'om juu.

Nn'aⁿ na tyoonec'unco ndo' yolcu na jnda ljondye

25 Ñ'oom na cwita'x'ee'yo' nooⁿ cantyja 'naaⁿ yolcu na tyoo'unco, tjaa'naⁿ ñ'oom na matsaⁿntjom Ta Jesúś ja cantyja 'naaⁿ' ñ'oomwaa'. Saq nc'e na matseixmaⁿya ts'aⁿ na wi' ts'oom, ntyjii na ndaaⁿ nla'ñ'oom'ndyo' ñ'oom na matsjoo cantyja 'naaⁿ' ñ'oomwaa'. **26** Cwe' nc'e jndye nnom quich'een'aⁿ tiempomeiiⁿ, jo' chii macwjii'a cwenta na yaticheⁿ caljoo'ñe ts'aⁿ cha'xjeⁿ na jnda teijnoom'm. **27** Xeⁿ m'aaⁿ scu', tintseityui' ljeii na tma'co' jom. Saq xeⁿ tjaa'naⁿ scu', tical'ue' ts'aⁿ na nluiiñe scu'. **28** Saq xeⁿ aa mma'co', tjaa'naⁿ jnaⁿ naljo'. Ndo' mati cwii yuscundyua, tjaa jnaaⁿ xeⁿ ncoco. Ee jndye nnom nawi' quich'een'aⁿ na nntjoom nn'aⁿ na nnc'unco ndo' ñe'cateijndeiya 'o na tincwinom'yo' joona'.

29 'O nn'aⁿya na cwila'yu'yo', luua waa na ñe'catsjooⁿya: Jnda teitsiqoⁿ xuee na nncwjee'nnda' Cristo. Nc'e na ljo' joo nn'aⁿ na jnda t'unco, c'omna cha'cwijom tjaa'naⁿ lcuuna, tjaa'naⁿs'aana. **30** Joo nn'aⁿ na m'aⁿ na chjoo' n'om,

c'omna cha'xjeⁿ quia waa xuee. Ndo' joo nn'aⁿ na m'aⁿ ncuee, c'omna cha'cwijom m'aⁿna na chjoo' n'omna. Ndo' nn'aⁿ na cwilajnda 'naⁿ c'omna cha'cwijom nchii 'naaⁿna jo'. ³¹ Ndo' joo nn'aⁿ na cwiwil'uee'ndye 'naⁿ na cwila'xmaⁿ cantyja 'naaⁿ tsjoomnancuewaña, matsona' na c'omna cha'cwijom na ticajnda nquiuna ljo' la'xmaⁿna', ee juu na matseixmaⁿ tsjoomnancuewaña mawjaantycwiina'.

³² Til'ue ts'ooⁿ na jndye ñomtiuu nc'om'yo', ee ts'aⁿ na tjaa'naⁿ scuu', m'aan^l ts'oom chiuu nnc'oom jo nnom Ta Jesús, na nncjaawee' ts'oom ñ'eⁿñe, ³³ saq ts'aⁿ na m'aan^l scuu', m'aan^l ts'oom cantyja 'naaⁿ'naⁿ na macaⁿna' cha neii^{nl} scoom'm ñ'eⁿñê. ³⁴ Ndo' na luua' waa, tiñecwii m'aan^l ts'oom. Ñecwii xjeⁿ mat'uiina' cantyja 'naaⁿ yuscu na tjaa'naⁿ saa' ñequio yuscu ndyua na tyoococo. Joona m'aan^l n'omna cantyja 'naaⁿ ts'iaaⁿ 'naaⁿ Ta Jesús, na nñequiandyeñ'eⁿna na la't'maaⁿndyena jom cantyja 'naaⁿ seiina ñequio espíritu 'naaⁿna. Saq yuscu na jndä mam'aaⁿ saa', m'aan^l ts'oom cantyja 'naaⁿ 'naⁿ na macaⁿna' ndo' ñequio chiuu na nnc'oom cha nncjaawee' ntyjii saaⁿaⁿ ñ'eⁿñê.

³⁵ Nchii matsjoo ñ'oommei^{nl} ndäq'yo' ee tical'ue ts'ooⁿ na nnc'unco'yo' saq cha na nnteijndeina' 'o ndo' cha na xcwee' n'om'yo' na nndye'ntjom'yo' nnom Ta Jesús.

³⁶ Ñ'oom na jndu'yo' na m'aaⁿ cwiindyo' 'o na m'aaⁿ nomjnda na jndä jaawinom'na' na ndyuaña ndo' 'u na tsotyeeⁿ jndä mamatseitiuu' na ya xeⁿ nncocotoom, maxjeⁿ ya na nluii na ljo'. Ee nchii jnaⁿ na nntsa' na ljo'. ³⁷ Saq xeⁿ m'aaⁿ cwii ts'aⁿ

na jndā seijndaa'ñē naquii' ts'om na xonquiaa na nncoco nomjnda, ee na manty'iaa' na ticaⁿna', ya cats'aa na ljo'. ³⁸ Quia jo' ya mach'ee ts'aⁿ na maw'ø ñomcaa' jndā, s̄aq̄ yati mach'ee juu ts'aⁿ na matseiljo nomjnda.

³⁹ Yuscu na m'aⁿ saa', mat'uiityeⁿna' juu ñ'eⁿñē yochenⁿ na wando' tsaⁿ'ñeeⁿ. S̄aq̄ xeⁿ nncue' tsaⁿ'ñeeⁿ, wanaaⁿ na ncoconnaaⁿaⁿ ñ'eⁿ meiⁿquia ts'aⁿ na l'ue ts'oom, macandā ñequii'chenⁿ ts'aⁿ na matseiyu'. ⁴⁰ S̄aq̄ matseitiuu yati mach'eeⁿ xeⁿ na nljoo'ñē na ñenqueⁿ. Luua' m'aⁿ ts'ooⁿ cantyja 'naaⁿ ñ'oomwaa' ndo' mantyjii na matseixmaⁿya Espíritu na cwiluiñē Ty'oots'om.

8

Nantquie na cwila't'maaⁿ'ndye nn'aⁿ 'naⁿ na cwe' nn'aⁿ nl'a

¹ Je' nnc'oya ñ'oom na cwita'xe'yo' cantyja 'naaⁿ seii quioo' na cwila'cwjee nn'aⁿ na cwila't'maaⁿ'ndyena 'naⁿ na cwe' nn'aⁿ l'a. Ñ'oom na mayuu' na cha'tsondyo cwiluiindyo nn'aⁿ na jndo' n'ooⁿya cantyja 'naaⁿ ñ'oomwaa', ndo' juu jo' wjan'oomna' jaa na c'ooⁿya na s'andyo, lcundyo. S̄aq̄ juu na m'aⁿya na jndā nquiuya nn'aⁿ, mateijndeina' na tsaanajndaaya na cwila'yuu'a. ² Ts'aⁿ na matseitiuu na jndye waa na jndo' ts'om, tyootsei'nⁿ cha'xjeⁿ na macaⁿna' na caljeii. ³ S̄aq̄ nqui ts'aⁿ na jndā ntyjii ñequio Ty'oots'om, mawajnaⁿaⁿ tsaⁿ'ñeeⁿ.

⁴ Cantyja 'naaⁿ aa wanaaⁿ na nntquie'yo' seii quioo' na cwiwil'uee'ndye nn'aⁿ na cwila't'maaⁿ'ndye 'naⁿ na cwe' nn'aⁿ l'a,

cwila'noq'n'a na meiⁿcwii tjaa ljo' la'xmaⁿ joona'
 ee maxjeⁿ macanda^q nqueⁿ m'aaⁿ. ⁵ Ee cañoom'luee
 ñequio tsjoomnancue jndye nnom na maniom
 na cwila't'maaⁿ'ndye nn'aⁿ na cwiluena na t'maⁿ
 ñ'oom la'xmaⁿ, saa^q joona' nchii nquii Ty'oqts'om
 cwiluiindyena'. Ndo' na mayuu' na jndye 'naⁿ
 maniom na cwilue nn'aⁿ "Ta" ndaqana', ndo'
 cwituee'ndyecjena cantyja 'naaⁿ joona'. ⁶ Saa^q
 cantyja 'naaⁿ jaa nmeiiⁿ ñecwii Ty'oqts'om m'aaⁿ,
 ndo' jom cwiluiiñê Tsotyaaya. Cantyja 'naaⁿ jom
 cha'tso na maniom, jom tqeeenⁿ jo', ndo' nc'e jom,
 jo' na m'aaⁿya. Ndo' mati ñecwii m'aaⁿ na cwiluiiñê
 na matsa^qntjom jaa, nquii Jesucristo. Cha'tsoti na
 maniom, cwim'aⁿna' nc'e nqueⁿ, mandii ñ'qaⁿ jaa.

⁷ Saa^q ticha'tsondye nn'aⁿ cwila'noq'n'a na ljo' ee
 jndaq ljeii'na' na cwila't'maaⁿ'ndyena cwii na cwe'
 nn'aⁿ l'a, ndo' quia cwicwa'na nantquie'ñeeⁿ,
 cwitjeii'na cwenta na cwila't'maaⁿ'ndyena
 juuna'. Ndo' nc'e na tyoowijndo' n'omna cantyja
 'naaⁿ ñ'oommeiⁿ, jo' chii juu na m'aaⁿ n'omna
 tseixmaⁿna' cwii na jndaq t'aa'na' na cwajndii.

⁸ Ee nchii cwe' aa macwa' ts'aⁿ nantquie'ñeeⁿ,
 oo, aa ticwaaⁿaⁿ joona', jo' na macjaawee'
 ntyjii Ty'oqts'om jom. Meiiⁿ nchii na jeeⁿ ya
 nn'aⁿndyotyaa xeⁿ cwicwaa'a joona', oo nchii
 nn'aⁿ na tiann'aⁿndyotyaa xeⁿ ticwaa'a joona'.

⁹ Saa^q cal'andyo' cwenta na juu lLua'a na wanaaⁿ
 na c'om'yo', titseixmaⁿna' cwii na nnts'aana' na
 nntseitjooñe cwii nn'aⁿyo' na cachjoo matseiyu'.

¹⁰ Ee xeⁿ 'u na ntyji' chiuu wanaaⁿ na nntsa',
 mawacatyenⁿ cwii joo yuu na cwila't'maaⁿ'ndye
 nn'aⁿ cwii na cwe' nn'aⁿ l'a, ndo' cwii ts'aⁿ na tityeⁿ
 na matseiyu' nty'iaaⁿaⁿ 'u jo', nndaq nnts'aana'

na mache' na luga', nnc'omt'maa^{n!}ñe ts'oom na mati lcwaan'aⁿ 'naⁿ na cwila't'maa^{n!}ndye nn'aⁿ ty'oo'ñeeⁿ. ¹¹ Ndo' na luga', juu na matsei'no^{n!} na wanaaⁿ na ljo' mache', nntsei'ndaa'naⁿ juu nn'a^{n!} na tityeⁿ matseiyu', na mati tue' Cristo cwentaa^{n'aⁿ!}. ¹² Quia laa'ti' cwil'a'yo' ñequio joo nn'a^{n!}yo' na tit'maⁿ cwilayu'ya n'om, cwila'tjooñdyo' ndaqana na cwila'ñ'ee^{n!}ndyo' n'omna. Ndo' mati cwilaxma^{n!}yo' jnaⁿ jo nnom Cristo. ¹³ Jo' chii xeⁿ cantyja 'naa^{n!} na macwa'a cwii nnom nantquie na cwiwil'uee'ndye nn'aⁿ na cwila't'maa^{n!}ndye cwii na cwe' nn'aⁿ l'a, xeⁿ jnaa^{n!} jo' matseitjooñe cwii nn'aⁿya na matseiyu', quia jo' tajom cwinlcwaa'nnda'a juuna' cha tintseilcwe'tya'na juu nn'aⁿya.

9

Ts'aⁿ na cwiluiñe apóstol, waa najndeii na matseixmaaⁿ

¹ Joo na wanaaⁿ na l'a apóstoles, mati ja tseixmaⁿ jo' ndo' chiuu waa na laxmaⁿna, mati jo' matseixmaⁿya. Jndaq nty'ianooⁿya Jesús na cwiluiñe na matsaq'ntjoom jaa, ndo' 'o cwiluiindyo' cwentaa^{n'aⁿ} nc'e ts'iaa^{n!} 'naa^{n!}aⁿ na tyots'aaya quii'ntaa^{n!}yo'. ² Nndaq nnts'aana' na nt'omcheⁿ nn'aⁿ cwitjeii'na cagenta na ticaluiindyo^q apóstol, saaq jo ndaq 'o matsona' na cwiluiindyo^q na ljo' ee juu na cwila'yu'yo' ma'moⁿna' na ljo'.

³ Ndaq joo nn'aⁿ na cwilue na nchii cwiluiindyo^q apóstol, luga waa ñ'oom na matseilcwā'a ndaqana.

⁴ Waa na matseixmaⁿya na wanaaⁿ na nnco'ñqⁿ na macaⁿna' na nlcwaa'a ndo' na nlcwāya, ⁵ ndo'

mati wanaaⁿ na nncjaan^{'e}n cwii yuscu na matseiyu' quia j̄onquiaya ñ'oom naya cha'xjeⁿ cwil'a nt'omcheⁿ apóstoles, ñequio ntyjee nquii Ta Jesús ndo' mati Pedro. ⁶ Ndo' ðaa m'aaⁿ n'om'yo' na cwe' macandaⁿ nquii Bernabé ñ'eⁿndyo ja na ticatsonaⁿ na nnateixe'yo' jâ? ⁷ Ee ð'ñeeⁿ sondaro na cwe' nquii matseicatsuu 'naⁿ na macaⁿa' juu na macaa ndia'? Ndo' ð'ñeeⁿ ts'aⁿ na manom' cwii ntjom l'oo uva na tiquii taaⁿa'? Ndo' ð'ñeeⁿ ts'aⁿ na mateix'e canmaⁿ na tic'uu ndaatsuuyo'? ⁸ Meiⁿ ticala'tiuu'yo' na cwe' tomti ñ'oom na m'aaⁿ n'om nn'aⁿ na macwjii'a. Ee ljeii na tquiaa Ty'oots'om nnom Moisés, majo'ti matsaⁿntjomna'. ⁹ Ee naquii' libro'ñeeⁿ teiljeii: "Tintjaalndyo' bosa ndyuee quioo'ndyo yocheⁿ na cwil'a'yo' ts'iaaⁿ." Saa meiiⁿ na ljo' teiljeii, nchii macandaⁿ ma'moⁿna' na cwe' cantyja 'naaⁿ quioo'ndyo ñjom ts'om Ty'oots'om. ¹⁰ Nc'e na m'aaⁿ ts'om cantyja 'naaⁿya, jo' chii teiljeii ñ'oomwaa'. Naya 'naaⁿya na teiljeiina', ee juu ts'aⁿ na matseindyaa tyuaa ñequio juu ts'aⁿ na macwja' lqueenⁿ, cwil'ana ts'iaaⁿmeiⁿ na ntyjaaiⁿ omna na nleil'uee'ndyena na cwiwe'. ¹¹ Jo' chii nc'e na jndⁿ jnooⁿâ tsjaanⁿ cantyja 'naaⁿ Espíritu naquii' ntaaⁿyo', ticwinom'na' na nñequia'yo' na cwitaaⁿyâ ndaayao' chjoowi' 'naⁿyo' cha'cwijom cwii na jndⁿ tue'. ¹² Nt'omchen nn'aⁿ na cwit'moⁿndaaⁿyo' cwil'ana na cateijndei'yo' joona. Ndo' majndeitiicheⁿ jâ wanaaⁿ na cateijndei'yo'.

Meiiⁿ na wanaaⁿ na ntaaⁿyâ na cal'a'yo' na ljo', saa meiⁿjom ndii' tyool'uuyâ. Ee cwila'quii n'ooⁿyâ naquii' na cwitjooⁿyâ cha ticatseitsaaⁿñena' na ya tsandye'yo' ñ'oom'

Ty'oots'om. ¹³ 'O manquiu'yo' nquiee ntyee cwentaa nn'aⁿ judíos na cwindye'ntjom naquii' wats'om t'maⁿ cwitquiina seiⁱ quioo' na cwila'cwjeena na cwiñequia nn'aⁿ na cwila't'maan'ndyena Ty'oots'om. Wanaaⁿ na cwitquiina sei'ñeeⁿ ee jo' jo' waa tio t'maⁿ yuu cwindye'ntjomna nnoom. ¹⁴ Ndo' cha'xjeⁿ cwicandaa naⁿ'ñeeⁿ 'naⁿ na cwiwil'uee'ndyena, maluaa' saⁿntjom Ta Jesús na joo nn'aⁿ na cwiñe'quia ñ'oom naya 'naaⁿaⁿ nnto'ñoomna ljo' na macaⁿna' joona nc'e ñ'oom'm na cwiñe'quiana. ¹⁵ Saa meiⁿjom ndii'tyoocaⁿa na nñequia'yo' ljo' na macaⁿna' ja, meiⁿ nchii matseiljeiya ñ'oomwaañe cha nnteijndeⁿljo' ja. Ee yati ntyjii meiiⁿ na aa nc'iø na tintsuu nayawaañe na cantyja 'naaⁿl jo' matseis'andyo.

¹⁶ Saa tyoocwjis'andyo na mañeQuiaya ñ'oom naya 'naaⁿl Ty'oots'om ndaq^al'yo' ee ts'iaaⁿ'ñeeⁿ matseixmaⁿya. Ndo' jeeⁿ nty'iaa'ndyo xeeⁿ ticatseicandaya juuna!. ¹⁷ Jo' chii xeⁿ mañeQuiaya ñ'oom nc'e na l'ue ts'ooⁿ nncqo, matsona' na nncwantj^on, saa xeⁿ mats'aa na ljo' nc'e na maty'ioom ts'iaaⁿ'ñeeⁿ ja, quia jo' cwe' matseicandaq^andyo ts'iaaⁿ na ty'ioom ja. ¹⁸ Quia jo' juu na mawantyjoⁿ, na m'aanya na neiⁿya na mañequia ñ'oom na macwjil'n'maaⁿñe Ty'oots'om nn'aⁿ na meiⁿcwii na chojnaⁿ'yo' nooⁿ, na nchii nncwantj^onya 'naⁿ na macaⁿna' ja na mañeQuiaya ñ'oom naya 'naaⁿl Ty'oots'om.

¹⁹ Ja meiiⁿ nchii cwiluiindyo moso na mandi'ntjomtyeⁿ nnom patron 'naaⁿl, saa jnda tqueⁿndyo cheⁿnncqo na matseixmaⁿya na ljo' ndaq^a cha'tso nn'aⁿ. Mats'aa na ljo' cha majndyeti

nn'aⁿ nncwantjoⁿ cwentaa' Cristo. ²⁰ Quia na m'aaⁿya quii'ntaaⁿ nn'aⁿ judíos, mats'aa cha'na cwii joona na m'aⁿna nacje 'naaⁿ ljeii na tquiaa Moisés cha nncwantjoⁿya joona cwentaa' Cristo, meiiⁿ tic'ooⁿya nacje 'naaⁿna'. ²¹ Ndo' jo ndaaⁿ na tic'omna nacje 'naaⁿ ljeii na tqueⁿ Moisés, mats'aa cha'na cwii nquieena cha nncwantjoⁿya joona, meiiⁿ na mayuu' m'aaⁿya nacje 'naaⁿ ljeii 'naaⁿ nquii Ty'oots'om nc'e na m'aaⁿya nacje 'naaⁿ Cristo. ²² Quia na m'aaⁿya ñ'eⁿ nn'aⁿ na cachjoo na cwila'yu'ya n'om, mati mats'aa na cachjoo matseiyu'ya ts'ooⁿ cha mati nncwantjoⁿya joona. Ndaaⁿ cha'tso nn'aⁿ mats'aa na matseixmaⁿya cha'xjeⁿ joona cha nt'omndye joona nlui'n'maaⁿndyena. ²³ Mats'aa cha'tso nmeiⁿ nc'e ñ'oom naya na cantyja 'naaⁿ jo' cwilui'n'maaⁿndye nn'aⁿ cha mati nntseijomndyoⁿ nequio naya na cwito'ñoom nn'aⁿ cantyja 'naaⁿna'.

²⁴ 'O manquiui'jndaaⁿndyo' quia cwitjomndye nn'aⁿ na nleinom, cha'tsondyena cwileinomna, saaⁿ macanda juu ts'aⁿ na nncuee'jndyee nla't'maaⁿndye nn'aⁿ juu. Quia jo' cala'jnda'yo' cha'xjeⁿ matseijndeii tsaⁿñeeⁿ. Cjoo'yaya n'om'yo' na cwindye'ntjom'yo' nnom Ty'oots'om cha mati nntseit'maaⁿñê 'o. ²⁵ Saaⁿ cjaañjoom' n'om'yo' cantyja 'naaⁿ joo nn'aⁿ na cwileinom, jndye nnom na cwila'ljondyena, ee cwicantyjaⁿ n'omna na nnta'ntjomna, meiiⁿ juu 'naⁿ na cwita'ntjomna tyuua' cwiwi'ndaa'na'. Jo' chii mati jaaⁿ cjoo'yaya n'ooⁿya na cwindya'ntjooⁿtyaaⁿya nnom Ty'oots'om nc'e juu na nnto'ñooⁿya na ñequiaaⁿ ndaaⁿaya tijoom cwi'ndaa'na'. ²⁶ Cantyja 'naⁿ ja luua tyoots'aa cha'na mach'ee ts'aⁿ na cwe'

maleinomto na tijndaa' yuu wjaayuu. Cantyja na mandi'ntjoⁿya nnoom, meiⁿ tyoots'aa cha' cwil'a nn'aⁿ na cwe' cwituee'to nnda' naquii' jndye. ²⁷ Nchii nmeiiⁿ mats'aa. Ja ñequio na jnde'i'na' maju'cja seii'a na catseicandana' na matsa'ntjoⁿya juuna', cha cwii na jndā t'moogⁿya ndaq^a nt'omcheⁿ ticwji'ndyona' ja na ticwil'uendyo naquii' ts'iaaⁿ 'naaⁿ Cristo.

10

Ticalat'maaⁿndyo meiⁿquia na cwe' nn'aⁿ l'a

¹ 'O nn'aⁿya na cwila'yu'yo', l'ue ts'ooⁿ na cala'nⁿyo' quia jlui' welooya nn'aⁿ judíos Egipto, cha'tsondyena tyotseintyjo Ty'oqts'om ncwaaⁿ nchquiu nacjoona ndo' cha'tsondyena teinomna Ndaaluee Wee. ² Ndo' na luala', cha'tsondyena teits'oomndyena na seitjoom'na' joona ñ'eⁿ Moisés quia na tyotseintyjona' nchquiu'ñeeⁿ cjoona ndo' na teinomna ndaaluee'ñeeⁿ. ³ Ndo' mati cha'tsondyena tyocwa'na maná na tquiaa Ty'oqts'om na jna'na' cañoom'luee, ⁴ ndo' cha'tsondyena tyowena ndaatioo na tyocalui'na' quii' tsjo' na ñ'eⁿ ñ'eⁿna' ñ'eⁿndyena. Nquii Cristo cwiluiñe tsjo'ñeen. ⁵ Saq meiiⁿ na luala' tyom'aⁿna, maxjeⁿ majndyendyetina ticjaawee' ntyjii Ty'oqts'om ñ'eⁿndyena ee tical'ana yuu na l'ue ts'oom. Macwe'jo' jndyendyena tjana ndyuaa yuu tja nn'aⁿ c'oom.

⁶ Cha'tso nmeiⁿ na tyotjoomna laxmaⁿna' cwii na ma'moⁿna' ndaqaya na tila'queenⁿ n'qoⁿya cwii cwii nnom natia cha'xjeⁿ tyola'queenⁿ n'omna. ⁷ Jo' chii tila't'maaⁿndyo' cwii na cwe' nn'aⁿ l'a cha'xjeⁿ ñel'a nt'omndye joona ee tso ñ'oom na

teiljeii: "Ty'ewindyuaandye nn'aⁿ na nlcwa' ndo' na nncwe, jnd^a jo' teicantyjana na l'ana cha'xjeⁿ nn'aⁿ na tic'om nacie 'naaⁿ' Ty'oots'om." ⁸ Meiⁿ tanc'ooⁿya na cwe'luaa'ndyo ñ'eⁿ nt'omcheⁿ nn'aⁿ cha'xjeⁿ na tyol'a joona ee jnaaⁿ jo' na s'aa Ty'oots'om na ñecwii xuee tj^a ntquiuu nchoo' ndyee meiⁿndyena. ⁹ Meiⁿ tacal'aaya xjeⁿ Cristo cha'xjeⁿ ñel'a nt'omndye joona, ee jo' na tquii canduu joona ndo' tjana. ¹⁰ Meiⁿ tilancjoo'ndyo' nnom Ty'oots'om cha'xjeⁿ ñel'a nt'omndye joona, ndo' jnaaⁿ jo' na jñoom ángel na jndyotseicwjee joona.

¹¹ Cha'tso nmeiⁿ na tyotjoom weloo welooya, laxma'na' cwii na ma'moⁿndyeyuna' ndaqaya, ndo' teiljeii joona' quii' ñ'oom' Ty'oots'om cwii na matseijndo'na' n'ooⁿya chiuu maca'na' na c'ooⁿya ncueemeiiⁿ na macand^a. ¹² Jo' chii ts'aⁿ na matseitiuu na meintyjee'tyeⁿ cantyja 'naaⁿ' Ty'oots'om, cats'aañe cwenta na ticju'cjena' juu. ¹³ Ee joo na cwiwinom'yo' na maque'na' xjeⁿ 'o cha cala'tjoondyo' nnom Ty'oots'om, ticachuii'na' ñequio na cwitjoom nt'omcheⁿ nn'aⁿ. S^aq jom cwiluiiñê na mayoom'm, meiⁿ tijoom quiaaⁿ na juu na maque'na' xjeⁿ 'o nncwinom'na' juuna' na xocand^a nna'ndyo' ndo' mati nñequiaaⁿ na ya nluii'ndyo' naquii' juuna'. ¹⁴ Jo' chii 'o nn'aⁿya na jeeⁿ wi' ts'ooⁿya, cantyja 'naaⁿ' na nla't'maaⁿndyo' 'naⁿ na cwe'nn'aⁿcwil'a, c'om'yo' cha'na ts'aⁿ na jndeii maleinom na nquiaⁿaⁿ na nnt'uii nawi' jom. ¹⁵ Matsjoo na ljo' ndaq'yo' ee ntyjiiya na 'o cwila'nqⁿyo'. Jo' chii que'ya'yⁿ cwenta ñ'oom na matsjoo. ¹⁶ Ee cwiñequiaaya

na quianl'uaa' Ty'oots'om xjeⁿ na cwito'ñooⁿya waso, juu jo' ma'moⁿna' na cwilajomndyo cantyja 'naaⁿ nioom' Cristo. Ndo' quia cwityja^a tyoo' ma'moⁿna' na cwilajomndyo cantyja 'naaⁿ seiiⁿen'. ¹⁷ Ee meiiⁿ na jndyendyo saa ñe'cwii tyoo' cwicwaa'a ndo' nc'e na ljo' ñe'cwii sei' cwiluiindyo.

¹⁸ Cala'nqⁿyo' cantyja 'naaⁿ tmaaⁿ nn'aⁿ Israel. Nn'aⁿ na cwitquiina seii quioo' na cwitioona nacjoo' tio wats'om t'maⁿ, xjeⁿñeeⁿ cwilajomndyena cantyja 'naaⁿ quioo' na cwila'cwjeena. ¹⁹ Ndo' na matsjoo na luua', tila'tiuu'yo' na ñe'catsjoo na juu 'naⁿñeeⁿ na cwila't'maaⁿndye nn'aⁿ waa najndeii na matseixmaⁿna' meiⁿ nchii na ñe'catsjoo na juu sei' na cwiñequia naⁿñeeⁿ nnom juuna' jndati matseixmaⁿna' ñequio meiⁿquia sei'. ²⁰ Ñ'oom na matsjoo cantyja 'naaⁿ ñ'oomwaa', joo nn'aⁿ na tic'omna cantyja 'naaⁿ Ty'oots'om, quia cwila'cjweena quioo', nchii nnom jom cwiñequiana sei'ñeeⁿ, ndaq naⁿjndii cwiñequiana joona'. ²¹ Ee ticatsona' na nncwe'yo' na njom waso na cwiwe nn'aⁿ na cwila'jomndye ñequio Cristo, ndo' mati nncwe'yo' cwii na matseixmaⁿna' cantyja 'naaⁿ naⁿjndii. Meiⁿ ticatsona' na nlcwa'yo' na cwila'jomndyo' ñequio Cristo, ndo' mati nlcwa'yo' cwii na matseixmaⁿna' cantyja 'naaⁿ naⁿjndii.

²² ¿Aa ñe'cal'aaya na jaa jndaq^atya^a nchiiti jom ndo' jom jeeⁿ xueeⁿ jaa?

*Ts'aⁿ na matseiyu' cats'aaⁿ cha'tso ñequio na wi'
ts'oom tyjenn'aⁿñé*

23 Waa ñ'oom na cwilue nn'aⁿ: “Wanaaⁿ na nnts'aa ts'aⁿ meiⁿquia na ñe'cats'aa.” Ñ'oom na mayuu' jo', saa ticha'tso mateijndeina' jom. Mayuu' wanaaⁿ na nnts'aa ts'aⁿ ljo' na l'ue ts'oom, saa ticha'tso mateijndeina' na nncjaanajneiⁿ jo nnom Ty'ooots'om. **24** Ee nchii ñequii'cheⁿ nc'oom' ts'om ts'aⁿ cantyja 'naaⁿ nqueⁿ. C'oom' ts'oom cantyja 'naaⁿ nt'omcheⁿ nc'iaaⁿaⁿ na cwila'yu', cwaanⁿ cwii na nnts'aaⁿ na nntejndeina' joona na nnc'oonajndana cantyja na cwila'yu'na.

25 Wanaaⁿ na nntquie'yo' cha'tso nnom sei' na cwileil'ua. Meiⁿ tinta'xe'yo' ¿aa cwiwil'uee'ndye nn'aⁿ sei'ñeeⁿ xjeⁿ na cwila't'maaⁿndyena cwii na cwe' nn'aⁿ cwil'a? Ee na nliu'yo' na ljo' nndaaa nnts'aana' na nntsei'ndaa'na' nquiu'yo'. **26** Ee naquii' Salmos matsona': “Tsjoomnancue ñequio 'naⁿ na matseixmaⁿna', cha'tso jo' 'naaⁿ nquiui Ta Ty'ooots'om.”

27 Cwii ts'aⁿ na nchii ts'aⁿ na matseiyu', xeⁿ maqueen'ñê cwii 'o waⁿaⁿ na nlcwa' ñ'eⁿñê, wanaaⁿ na nncja' xeⁿ aa l'ue ts'om'. Cwa' meiⁿquia na mañequeiaa tsan'ñeeⁿ. Saa cha tintsei'ndaa'na' ntyji' tincwaxe' aa ts'iaaⁿ sei'ñeeⁿ na cwila't'maaⁿndye nn'aⁿ cwii na cwe' nn'aⁿ l'a. **28** Saa xeⁿ nntso cwii ts'aⁿ njom!: “Sei'waañe jnda tacatyeeⁿna' cwentaa' cwii na cwe' nn'aⁿ l'a”, jo' chii 'u je' tinlqui' juuna'. Ee meiiⁿ na xocatsei'ndaa'na' 'u xeⁿ na nlqui' juuna' saa nntsei'ndaa'na' ts'om ts'aⁿ na t'moⁿ njom' ee m'aaⁿ ts'oom na ticatsona' na nlqui' juuna'. **29** Matseinaqⁿ cantyja 'naaⁿ juu na m'aaⁿ ts'om tsaⁿñeeⁿ na seicandii 'u, nchii cantyja 'naaⁿ na m'aaⁿ ts'om' nncu'.

Saa nndaa nnts'aana' na nncwax'ee cwiindyo' 'o: “¿Chiuu na matsona' na ja catseiljondyoyó cwe' chiuu na m'aan' ts'om cwiichen? ³⁰ Ee xeⁿ mañeiquiaya na quianl'uaa' Ty'ooots'om cantyja 'naan' juu na macwa'a, quia jo' ¿yuu waa na nncju'naa^n̄ena' na nntso ts'a^n na tixcwe mats'aa?” ³¹ Quia jo' na cwicwa'yo' ñequio na cwiwe'yo', ñequio meiⁿquia na cwil'a'yo', na cha'tso na cha'tso ñequii'cheⁿ cats'aana' na caluiit'ma^n̄neti Ty'ooots'om cantyja 'naa^n' jo'. ³² Til'a'yo' cwii nnom na cantyja 'naa^n' jo' nntseilcwe'na' ts'a^n cantyja 'naa^n' Ta Jesú, meiiⁿ na ts'a^n judío, meiiⁿ nn'a^n na nchii judíos, ndo' meiiⁿ joo nn'a^n na laxma^n tmaa^n cwentaa' Ty'ooots'om. ³³ Malaa'ti' waa na quits'aaya, ee matseijndo na cha'tso cantyja 'naa^n ya nncjaawee' n'om nn'a^n. Nchii mal'ueendyo na joo na mats'aa na cwe' ja cateijndeina', saa cateijndeina' na majndyeti nn'a^n nlui'n'maa^ndyena.

11

¹ Jo' chii cw'aa'ndyo' ja cantyja na mats'aaya ee ja jom'aa^n ya cha'xjeⁿ na tyoch'ee Cristo.

Luaa c'om yolcu quia cwitjomndye nn'a^n

² Matseit'maa^n'ndyo 'o na ñequii'cheⁿ cwijaañjoom' n'om'yo' ja ndo' cwilawe'yo' ñ'oom na jnda tquaan'ya ndaa'yo' ³ Saa l'ue ts'oo^n na nla'no^n'yo' na tseixmaa^n Cristo xqueⁿ cwii tsa^n's'a ndo' juu tsan's'a tseixmaa^n xqueⁿ scoom'm cha'xjeⁿ nquii Ty'ooots'om tseixmaa^n xqueⁿ Cristo. ⁴ Jo' chii xeⁿ matiom tsan's'a 'na^n xqueⁿ quia matseineiⁿ nnoom oo quia mañequiaa ñ'oom'm, matseijnaa^n tsa^n'ñeeⁿ Cristo na cwiluiñe xqueeⁿ.

5 Saa^ñxuii' cantyja 'naaⁿ' cwii yuscu, xeⁿ ticataⁿ
xqueⁿ quia na matseineiⁿ nnom Ty'oots'om
oo quia na mañequiaa ñ'oom'm matseijnaa^{n'a}
saa^{n'a}. Xeⁿ na ljo' mach'eeⁿ matseijomna' cantyja
'naa^{n'a} cha'cwijom na jnd^ateinqui' caseii xqueen".
6 Ndo' xeⁿ tical'ue ts'om yuscu na ñjom 'naⁿ xqueen",
quia jo' cateinqui' xqueen". Saa^ñ nc'e na jeeⁿ t'maⁿ
matseijnaa^{n'na} jom na nnoⁿ soxqueen" oo na
nnteinqui' caseii, quia jo' cañjom 'naⁿ xqueen".
7 Saa^ñ tsaa^{s'a} je', ticaty'iomna' na ñjom 'naⁿ xqueen"
ee jluii'ñë Ty'oots'om ndo' tqueen" na cantyja 'naa^{n'}
juu na caluiit'maa^{n'ñë} saa^ñwandyoo' cantyja 'naa^{n'}
tsaⁿscu ee tsaa^{s'a} matseit'maa^{n'ñëna} cantyja
'naa^{n'a}. 8 Ee quia na s'aa Ty'oots'om tsaa^{s'a},
nchii teil'uee'ñë tsaaⁿscu na tuii na ljo', teil'uee'ñë
tsaa^{s'a} na s'aaⁿ tsanscu. 9 Meinⁿ nchii na s'aaⁿ
tsaa^{s'a} cha cateijndeina' tsaaⁿscu, s'aaⁿ tsaaⁿscu cha
cateijndeina' tsaa^{s'a}. 10 Manc'e na luua' waa ndo'
nc'e na cwiqueen ángeles cwenta, jo' chii matsona'
na cañjom 'naⁿ xqueen yuscu cha m'moⁿna' na
maju'ñecjeeⁿ nnom saa^{n'a}. 11 Saa^ñ cantyja 'naaⁿ
jaa nn'aⁿ na cwila'yu', waa naya 'naa^{n'} tsaa^{s'a}
nc'e tsaaⁿscu, ndo' mati waa naya 'naa^{n'} tsaaⁿscu
nc'e tsaa^{s'a}. 12 Ee meiiⁿ na mayuu' najndyee s'aaⁿ
Ty'oots'om tsaaⁿscu ee tsaa^{s'a}, saa^ñ mati na mayuu'
na m'aⁿtsaa^{s'a} ee tsaaⁿscu, ndo' cha'tsoñ'eⁿ cwinaⁿ
na m'aⁿ Ty'oots'om.

¹³ C'oom'ya n'om'yo', ¿aa ndya' maty'iomyana' na ticañjom 'naⁿ xqueⁿ yuscu na nntseineiⁿ nnom Ty'oots'om? ¹⁴ Mati ma'moⁿyana' ndaaya na matseijnaaⁿ'na' tsans'a quia na teincoo sooxqueeⁿ, ¹⁵ saq matseit'maan'ñena' yuscu quia na cwiwitein-coo soxqueeⁿ, ee joona' tseixmaⁿa' cwii na matse-

icu'na' xqueen. ¹⁶ Saa xe'n m'aa'n ts'a'n na ticjaawee' ts'om ñ'oomwaa', maca'na' na catsei'noo'n'o'n na mei'n jâ mei'n nn'a'n cwii cwii tmaa'n' na macwji' Ty'oots'om cwentaa'a'n, tjaa'na'n cwiche'n nnom na cwil'aaya.

Tixcwe cwil'ana quia cwicwa'na Cena na tque'n Jesucristo

¹⁷ Ñ'oom na matseiljeitya ndaq'yo' leicandaa nntsjoo na ya cwil'a'yo' ee mach'eeda' quia cwitjomndyo' juu na cwil'a'yo' matseilcwe'na' 'o nchii na mateijndeina' 'o. ¹⁸ Ee najndyee jndaa mandiiya quia cwitjomndyo' na nla't'maa'n'dyoo' Ty'oots'om, titjoom' m'a'n'yo', ndo' m'aa'n' ts'oo'n na ljo'. ¹⁹ Ee maxje'n nleitquioo'yuu na titjoom' m'a'n'yo' cha m'mo'na' 'ñee'n joo quii'ntaa'n'yo' m'a'na na xcwee' n'omna jo nnom Ty'oots'om. ²⁰ Ndo' nc'e na titjoom' m'a'n'yo', jo' chii juu na cwicwa'yo', tiyuu' na tseixma'na' nquii Cena na seijndaa'ñe Ta Jesú. ²¹ Ee quia cwicwa'yo' cwii cwiindyo' matseityuaa'ti na nlcwa' na jndyoñ'oom, mei'n tinquiaan' na nntseijomñe cwicchen' x'iaa'n'a'n na matseiyu', ndo' na ljo' nt'om joona ma'ndiina' na ñe'jndo' ndo' nt'om jndaa jndyee. ²² ¿Chiuu 'o? ¿Aa maxje'n tjaa'na'n l'a'yo' yuu na nleiñ'oom' na nlcwa'yo' ndo' na nncwe'yo'? ¿Aa maxje'n ticuee' n'om'yo' nc'iaa'yo' na mati cwiluiindye tmaa'n' cwentaa' Ty'oots'om? Ee na laa'tii' na cwil'a'yo' cwila'jna'n'yo' joo nc'iaa'yo' na wanty'iaa m'a'n. ¿Aa cwila'tiuu'yo' na jee'n xcwe na cwil'a'yo'? Leicandaa nntsjoo na ljo'.

*Cantyja na seijndaa'ñe Jesucristo na cuaa Cena
(Mt. 26:26-29; Mr. 14:22-25; Lc. 22:14-20)*

23 Ee nnom Ta Jesús to'ñ_onya ñ'oom na t'moo_onya ndaa_a'yo', na mañejuu teijaaⁿ na seiquioo Judas jom luee nn'aⁿ, to'ñoom tyoo! **24** ndo' jnda na tquiaaⁿ na quianl'uua! Ty'oots'om cantyja 'naaⁿ'na', tyjeeⁿ juuna'. Tsoom: "Cato'ñoom'yo' tyoo'waa, cwa'yo' juuna'. Seii'a cwiluiñena'. Mañequiaandy_o na nnc'iø cha nncwañoom'na' 'o. Ñequii'cheⁿ na luala' nntsäl'a'yo' cha cat'moⁿ'yo' na cwicañjom n'om'yo' ja." **25** Ndo' mati jnda na tcwa'na, to'ñoom waso, tsoom: "Juu wasowaañe tseixmaⁿna' ñ'oomxco na maquaⁿya ñequio nioom'a. Cwii cwii ndii' na cwiwe'yo' juuna', cjaañjoom'tyeⁿ n'om'yo' ja." **26** Jo' chii ticwii cwii ndii' na cwicwa'yo' tyoo'waa ndo' na cwiwe'yo' na ñjom wasowaa, cwitsat-jei'yuu'ndyo' ndaa nn'aⁿ cantyja na tue' Ta Jesús, hasta quia na nndyonnaaⁿ'aⁿ.

Nchii cwe' nntseijomñeto ts'aⁿ quia cwicwa' nn'aⁿ
Cena

27 Jo' chii meiⁿquia ts'aⁿ na macwaaⁿ'aⁿ tyoo'waa oo ma'om na ñjom wasowaa na tic'oom'ya ts'oom na jnda tseixmaⁿna', waa jnaaⁿ'aⁿ nacjoo' seii' ndo' nioom' Ta Jesús. **28** Nc'e na ljo', matsona' na cwii cwii ts'aⁿ cwitjøochen na nlcwaaⁿ'aⁿ tyoo'ñeeⁿ ndo' na nnc'om na ñjom waso'ñeeⁿ, c'oom'ya ts'oom na aa tjaal'aⁿ cwii nnom cantyja 'naaⁿ'aⁿ na matseicu'na' na nntseijomñê juu jo'. **29** Ee ts'aⁿ na cwe' macwa'to ndo' cwe' ma'uuto meiⁿ ticwjaa'ñé cwenta na la'xmaⁿna' seii' Ta Jesús, juu na macwaaⁿ'aⁿ ndo' ma'om, matseijndaa'ñena' na waa jnaaⁿ'aⁿ cantyja 'naaⁿ'na'. **30** Macwe' jnaaⁿ' na nmeiiⁿ cwil'a'yo', jo' chii majndyendyo' 'o wii'yo' ndo' tijnda'yo', hasta nt'om nc'iaa'yo'

jnda tja. ³¹ Saq xe' ñequui'che' na cwiquaa'nyaaya cwenta aa cwil'aaya yuu na maty'iomyana', quia jo' tixoca'na' na nnts'aa Ta Jesús xje' jaa, ³² ee quia mañequiaa Ta Jesús jaa, luala' mach'ee' cha ntsaala'nqo'n'a ndo' cha tica'na' na nnt'uee' jaa cha'xje' nnt'uee' nn'a'na la'xma' cantyja 'naa'n' tsjoomnancue.

³³ Jo' chii 'o nn'a'nya na cwila'yu'yo', quia cwitjomndyo' na nlajomndyo' na nlcwa'yo' ndo' nncwe'yo' na cwicañjom n'om'yo' na tue' Ta Jesús, cwindo'yo' cwii ndo' cwii x'iaa'yo'. ³⁴ Ndo' xe' m'a'a' cwiindyo' 'o na ñe'jndo' cwa'jñee' na waa wa'n'a'cha' tica'na' na nnt'uii Ty'ooots'om jom na matseijomñê quia cwilajomndyo' Cena. Nt'omchen ñ'oom na cwita'x'ee'yo' noo', cuajndyaq na m'a'n'yo' quia jo' nntseijndaa'ndyo joona'.

12

Jndye nnom ts'iaa' mañequiaa Espíritu Santo

¹ 'O nn'a'nya na cwila'yu'yo', l'ue ts'oo'n na caliu'yo' chiuu mach'ee Espíritu Santo na cwicandaaya cwii cwii nnom na l'ue ts'oom cha nndaa nndya'ntjoo'nya nnom Ty'ooots'om.

² 'O manquiu'jndaa'ndyo' cwitjooche' na cwila'yu'yo', tyojaachuuna' 'o cha'cwijom na nchjaa'n'yo' na cwe' tyola't'maa'n'ndyo'to'yo' joo na cwe' nn'a' ñel'a na xondaq nla'nei'na'. ³ Jo' chii matsjoo' ndaa'yo', ts'a'na matseixma' Espíritu Santo, xocatso na cju'wi'na' Jesús. Ndo' mati xocatso ts'a'na cwiluiñe Jesús na matsa'ntjoom

juu xeⁿ nchii m'aaⁿ tsa^{n'}ñeeⁿ nacje 'naa^{n'} Espíritu Santo.

⁴ Nquii Espíritu Santo jndye nnom mañequeiaaⁿ na cwicandaaya cha cwicanda^qa cwil'aaya ts'iaaⁿ 'naa^{n'} Ty'oots'om. Sa^qa manquiityeeⁿ mañequeiaaⁿ na cwilaxmaaⁿya joo jo!. ⁵ Jndye nnom niom na cwindy^qntjooⁿya nnom Ta Jesú^s, sa^qa manquiiti Espíritu matseijndaa'^ñê cha'tso joona!. ⁶ Jndye nnom maniom na tjachuii' na cwiwil'ue cha cwicanda^qa cwil'aaya ts'iaaⁿ 'naa^{n'} Ty'oots'om. Sa^qa nqueⁿ ñe'cwii cwiluiiñê na mateijneiⁿ cwii cwiindyo na cwil'aaya joona!. ⁷ Nnom cwii cwiindyo mañequeiaa Ty'oots'om cwii nnom na ma'moⁿna' na laxmaaⁿya Espíritu cha nnlei'jndeiiina' nnc'iaaya na cwila'yu!. ⁸ Ñ'eeⁿ nn'aⁿ na mañequeiaaⁿ na cwiñe'quia ñ'oom' Ty'oots'om ñequio na jndo'ya n'om. Ndo' ñ'eeⁿ nt'omndye joona manquiiti Espíritu mañequeiaaⁿ na nnda^qa nla'neiⁿna ñ'oom cha nla'n^on' nn'aⁿ chiuu l'ue ts'om Ty'oots'om na nnc'omna. ⁹ Ñ'eeⁿndye joona na cantyja 'naa^{n'} Espíritu Santo la'xmaⁿna na cwila'yu'ya n'omna, ndo' nt'omndye joona cwicandaana na nla'n'maⁿna nn'aⁿwii. ¹⁰ Nt'omndye joona cwicandaana na nnda^qa nl'ana ts'iaaⁿ t'maⁿ na ticaluiina' cantyja 'naa^{n'} najndeii nquii ts'aⁿ. Ndo' nt'om joona cwicandaana na jeeⁿ ya cwiñequiana ñ'oom na ma'moⁿ Ty'oots'om ndaana. Nt'om joona cantyja 'naa^{n'} Espíritu mañequeiaa Ty'oots'om na nnda^qa ntjeii'na cwenta quia tiyuu' cwii ñ'oom na cwiñequia nn'aⁿ ndo' quia na mayuu' juuna!. Nt'om cwicanda^qa cwila'neiⁿ nt'omcheⁿ nnom ñ'oom ndo' wandyoo['] nn'aⁿ na mañequeiaaⁿ

na cwicanda^{aq} cwila'teincoo'na chiuu ma'moⁿ ñ'oom'ñeeⁿ. ¹¹ Espíritu Santo ñecwii cwiluiñé. Manquiityeeⁿ mañequiaaⁿ cwii cwii nnom ts'iaaⁿmeiⁿ ndaq nn'aⁿ cantyjati na l'ue ts'oome.

Lua matseijomna' na tjat'uii'ndyo ñ'e Cristo

¹² Matseijomna' cantyja 'naaⁿ' Cristo cha'cwijom ts'aⁿ na majndye tjat'uii' ndo' meiiⁿ jndyena' saa ñecwii ts'aⁿ tseixmaⁿ. ¹³ Ee cha'tsondyo meiiⁿ nn'aⁿ judíos jaa, meiiⁿ cwiluiindyo nn'aⁿ na cwila'neiⁿ ñ'oom griego, oo meiiⁿ nn'aⁿ na cwindya'ntjooⁿtyaaⁿya ndaa patrom 'naanya, oo meiiⁿ nn'aⁿ na m'aanya xjeⁿ 'naaⁿ ncjooⁿ, cwii na jndq teits'oomndyo cwiluiindyo ñecwii seii' Cristo nc'e ñecwii cwiluiñé Espíritu, ndo' cha'tsondyo jndq to'ñooⁿya jom.

¹⁴ Ee seii' ts'aⁿ nchii ñe'cwii nnom tseixmaⁿ, jndye nnom tjacañjoom'ñé. ¹⁵ Xeⁿ cweⁿ nntso x'ee ts'aⁿ: "Nc'e na titseixmaⁿya ts'o ts'aⁿ jo' chii ticat-seixmaⁿya cantyja 'naaⁿ' seii' ts'aⁿ." ¹⁶ Ndo' mati xeⁿ nntso tsua'qui ts'aⁿ: "Nc'e na nchii cwiluiindyo ts'omnnom ts'aⁿ, jo' chii ticat'uiindyo cantyja 'naaⁿ' seii' ts'aⁿ." Meiiⁿ na luaa' nntso tsua'qui ts'aⁿ, saa tiyuu' na ljo'. Maxjeⁿ t'uii'na' ts'aⁿ. ¹⁷ Ee xeⁿ cha'waañe ts'aⁿ ñequii'cheⁿ n'omnnoom cwiluiñé, ¿chiuu nnts'aayom na nñeeⁿ? Ndo' mati xeⁿ cha'waañe ts'aⁿ ñequii'cheⁿ lua'queen, ¿chiuu nnts'aayom na nncwjaaⁿ jndye? ¹⁸ Saa Ty'oots'om jndq seinchoom'm ticwii cwii nnom nmeiⁿ naquii' seii' ts'aⁿ cha'xjeⁿ na l'ue ts'oome. ¹⁹ Xeⁿ cha'waañe ts'aⁿ ñe'cwii nnom cwiluiñé, meiⁿchjoo ticanda^{aq}'ñe seii' ts'aⁿ. ²⁰ Sa^a meiiⁿ na jndye nnom na tqueⁿ Ty'oots'om na tjacat'uiñé

ts'aⁿ, maxjeⁿ ñ'eⁿ joo jo' canda^{aq} cwiluiiñe seii'
ts'aⁿ.

²¹ Ts'omnnom ts'aⁿ tijoom nnd^{aq} nntsona'
nnom ts'q^o ts'aⁿ: "Ja tjaa yuu l'uee'ndyo^o 'u." Meïn
xqueⁿ ts'aⁿ tijoom nnd^{aq} nntsona' nd^{aq} nc'ee ts'aⁿ:
"Ja tjaa yuu l'uee'ndyo^o 'o." ²² S^aq^o jeeⁿ wandy^o
waa cantyja 'naaⁿ ñ'oomwaa'. Ee mañ'eeⁿ yuu
na ñjoom'ñe ts'aⁿ na cwitjeii'a cwenta na ndoo'
nquiuya na mein tica^{nna}' joona!. S^aq^o jeeⁿ l'uena'.
²³ Ndo' cwii cwii nnom seii'a na nquiuya na
tit'maⁿ la'xma^{nna}', cwil'aaty^{aq} cwenta joona',
ndo' cwii cwii nnom seii'a na tia nquiuya na
nleitquoo'na' nd^{aq} nn'aⁿ, cwita'nty'iuu'ndyotya^{aq}
joona' ²⁴ s^aq^o joo na tjacañjoom'ndyo^o yuu na
titia nquiuya na nnty'iaa nn'aⁿ joona' meiⁿ
tica^{nna}' na nla'cuu'ndyo^o. Jo' chii cwiwitquoo' na
Ty'oots'om seicañjoom'm cha'waandy^oñ'a^{aq}ⁿ, ndo'
joo na cwila'cuu'ndyo^o, joona' t'ma^{nti} mañequiaaⁿ
na cwila'xma^{nna}'. ²⁵ Luua' waa na s'aaⁿ na
tjacañjoom'ñe ts'aⁿ cha ticatseitiuu ts'aⁿ na ya
nncoomñe meiiⁿ ticañ'en cwii joona'. Ee tqueen
nmeiⁿ cha catei'jndeindyena' cwii cwii nnom
seii'a na tjachuii'na'. ²⁶ Manc'e jo' chii quia wi'
mach'eena' cwii joo na tjacañjoom'ñe ts'aⁿ, wi'
mach'eena' cha'waañê. Ndo' quia ya cwii joona',
cha'waañê yaan'aⁿ.

²⁷ 'O cwiluiindyo' seii' Cristo, ee cwii
cwiindyo' matseixmaⁿ cwii cwii na tjacañjoom'ñe
na matseicanda^{aq}'ñena' seii'n'eⁿ. ²⁸ Maluaa'
matseijomna' na jnd^{aq} seijndaa'ñe Ty'oots'om
quii'ntaaⁿ nn'aⁿ na cwiluiindyo^o seii' Cristo.
Najndyee tqueen apóstoles, nd^{aq} we nn'aⁿ na
cwit'mooⁿ ñ'oom na jnd^{aq} t'mooⁿ nd^{aq}ana, jnd^{aq}

ndyee nn'aⁿ na cwit'mo^on ñ'oom naya 'naaⁿ'aⁿ, mati nn'aⁿ na nndaq^a nl'a 'naaⁿ t'maⁿ na xocandaa^a nluiina' cwe' najndeii nquii ts'aⁿ, ndaq^a jo' nn'aⁿ na nndaq^a nla'n'maⁿna nn'aⁿwii, ndaq^a jo' nquiee na cwila'jndaa'ndye ñ'oom, ndaq^a jo' joo nn'aⁿ na mats'ia jo' nndaq^a nla'neiⁿna nt'omcheⁿ nnom ñ'oom na tjachuii!. ²⁹ Ticha'tsondye cwiluiindy'e apóstoles, meiⁿ nchii cha'tsondye cwiluiindy'e profetas. Ticha'tsondye laxmaⁿ nn'aⁿ na cwit'mo^on chiuu ma'mo^on ñ'oom'm. Meiⁿ nchii cha'tsondye cwil'a ts'iaaⁿ t'maⁿ na tixocandaa^a nluiina' cwe' cantyja 'naaⁿ' najndeii na matseixmaⁿ nquii ts'aⁿ. ³⁰ Meiⁿ ticha'tsondye nndaq^a nla'n'maⁿ nn'aⁿwii. Mati ticha'tsondye nndaq^a nla'neiⁿ ñ'oom na tjachuii' ñequio ñ'oom na macwixjeⁿ cwila'neiⁿ, meiⁿ nchii cha'tsondye nndaq^a nla'teincoo' ljo' cwit'mo^on ñ'oom'ñeeⁿ. ³¹ Jo' chii jo nnom Ty'oots'om queⁿndyo' na nla'xmaⁿyo' nt'om ts'iaaⁿmeiⁿ na t'maⁿticheⁿ la'xmaⁿna'. Ndo' je' ñeca'mo^onya ndaa^ayo' cwii nnom na mañequiaaⁿ quiiⁱ n'o^onya na cwiluit'maⁿñeti juuna', nchiiti cha'tso nmeiⁿ!.

13

C'oo^onya na wi' n'o^on nc'iayaa

¹ Xeⁿ nndaq^a nntseina^aya nt'omcheⁿ nnom ñ'oom na cwila'neiⁿ nn'aⁿ, meiⁿ ñ'oom na cwila'neiⁿ ángeles, saaq^a tic'ooⁿ na wi' ts'o^onya nn'aⁿ, matsei-jomna' cantyja 'naⁿya cha'cwijom na c'uua tsom' na cwitjo' oo cha'cwijom ncjo cañjeeⁿ na cantseiiⁿ jndyeena!. ² Ndo' xeⁿ nndaq^a nntseina^a ñ'oom na ma'mo^on Ty'oots'om no^on ndo' matsei'noⁿa cha'tso na wanty'iuu' na matseijndaa'ñê na mandiñ'eeⁿ

cha'tso na matsei'noⁿ'a, hasta nndaq^a nquindyo^o
 ntsj^o nc'e na matseiyu'ya ts'ooⁿ, saq^a xeⁿ tic'ooⁿya
 nawi' ts'ooⁿya nn'aⁿ, meiⁿchjoo tjayuu l'uendyo^o.
 3 Ndo' xeⁿ cha'tso na maleiñ'^o mañequequia ndaa
 ndyeñeeⁿ ndo' meiiⁿ mañequeiandyo^o na nla'cuee'
 nn'aⁿ ja ñequio chom, saq^a xeⁿ tic'ooⁿ na wi' ts'ooⁿ
 nn'aⁿ, tjaa yuu l'uendyo^o.

4 Juu ts'aⁿ na jnda ntyjii nn'aⁿ, ticationm ts'om ñ'eⁿ
 naⁿñneeⁿ, mal'ueeⁿ chiuu nnteijneiⁿ nn'aⁿ, titaa'^a
 ts'oom, titseis'añê titseiscuñê cantyja 'naaⁿ'aⁿ,
 5 tintjeiññ^e ñ'eⁿ nc'iaa', nchii ñequii'cheⁿ na m'aaⁿ
 ts'om cantyja 'naaⁿ nquii, nchii ntyja ntyja mat-
 seiwⁱⁱ. 6 Juu na cwil'a nn'aⁿ na cwila'tjoondyena,
 tineiiⁿ'eⁿ, saq^a quia na majo'ndyo cwil'a nn'aⁿ,
 m'aaⁿ na neiiⁿ'eⁿ. 7 Ts'aⁿ na jnda ntyjii x'iaa'
 matseiquii ts'oom cha'tso na matjoom, ñequio na
 macantyja'a' ts'oom ndo' ñequio na ticationm ts'oom
 cantyja 'naaⁿ joona'.

8 Juu na m'aaⁿ ts'aⁿ na wi' ts'om x'iaa' tijoom
 cantycwiina'. Nncue'ntyjo^o xjeⁿ na tixocala'neiⁿ
 nn'aⁿ ñ'oom cantyja 'naaⁿ 'naⁿ na quia nluii, meiⁿ
 xocala'neiⁿna ñ'oom na tjachuui', meiⁿ xocaⁿna'
 ñ'oom na jndo' n'om nn'aⁿ. 9 Ee ticandaa'ñ'eⁿ
 cwila'nooⁿâ ndo' mati quia nla'nooⁿñ'aayâ
 ñ'oom'm na cwiñequiaayâ, 10 saq^a quia nncwjee'
 juu na candaq^a'ñ'eⁿ quia jo' n'ndiina' nmeiⁿ na
 ticandaa' la'xmaⁿ. 11 Quia ñet'ooⁿ na tyochjoo ja,
 tyotseinaⁿya, tyotseitiuuya ndo' ñet'oom' ts'ooⁿ
 cha'xjeⁿ cwii yucachjoo, saq^a quia na tue'ntyjo^o
 chuu'a 'ndi na ñet'ooⁿya cha'na joona. 12 Ndo'
 maluaa' waa na matseijomna' cantyja 'naaⁿya,
 je' juu na cwila'nooⁿâ cantyja 'naaⁿ Ty'oots'om,

matseijomna' juuna' cha'cwijom na manty'iaa' ts'aⁿ nnon tsjo'jñom na jndaq teitsa nnomna'. Saq juu na candaq'ñ'en quia na jndaq tyjee'cañoom juuna' quia jo' candaq'ñ'en nntsei'no'n'a. Je' cwe' xe'ntaⁿ xe'ntaⁿ matsei'no'n'a saq quia ljo'che' nntsei'no'ntcuundyo cha'xje' nquii Ty'oots'om candaq'ñ'en mawajnaⁿaⁿ ja.

¹³ Niom ndyee nnom na waa ndo' waana': na matseiyu'ya ts'om ts'aⁿ ñ'en Ty'oots'om, na macantyjaⁿ ts'om ts'aⁿ ñ'en jom ndo' na m'aaⁿ na jee' candyⁿ ts'oom jaa, saq t'manti naquii' ntaaⁿ ndyee nmeiiⁿ, juu na m'aaⁿ na candyⁿ ts'oom nn'aⁿ.

14

Nn'aⁿ na nndaq nla'neiⁿ ñ'oom na tjachuii'

¹ Jo' chii cjoo' n'om'yo' na c'om'yo' na jndaa nquiu'yo' nn'aⁿ ndo' mati cantyjaⁿ n'om'yo' na nquii Espíritu Santo nñequiaaⁿ na nndaq'yo' na nndaq nl'a'yo' ts'iaaⁿ 'naaⁿ Ty'oots'om, majndeiiⁿ na nndaq nñequia'yo' ñ'oom'm.

² Ee ts'aⁿ na matseineiⁿ meiⁿ nquia nt'omcheⁿ nnom ñ'oom cwe' tomti nnom Ty'oots'om matseineiⁿ, nchii ndaq nn'aⁿ nc'e tjaa 'ñeeⁿ juu na matsei'no'n' ñ'oom'ñeeⁿ. Cantyja 'naaⁿ Espíritu Santo matseineiⁿ ñ'oom na wanty'iuu' m'aaⁿna', saq tjaa 'ñeeⁿ juu nntsei'no'n' ñ'oom'ñeeⁿ. ³ Saq ts'aⁿ na mañequiaa ñ'oom' Ty'oots'om, 'oonajndaa nc'iaaⁿaⁿ na cwilayu' nc'e ts'iaaⁿ na mach'eeⁿ ndo' cantyja 'naaⁿ na ljo' cwiñ'omt'maaⁿndyena n'omna, ñ'oom'ñeeⁿ matseinjoom'na' joona. ⁴ Juu ts'aⁿ na nndaq nntseineiⁿ cwiicheⁿ nnom ñ'oom na tjachuii', jaawijndeii cheⁿ nqueⁿ cantyja

'naaⁿ' Espíritu Santo s̄aq juu ts'aⁿ na matseineiⁿ ñ'oom na ma'moⁿ nquii Ty'oots'om nnom, ts'iaaⁿ'ñeeⁿ mach'eena' na 'oonajndā nn'aⁿ tmaaⁿ cwentaaⁿ'aⁿ. ⁵ Ya ntyjii xeⁿ cha'tsondyo' ya nlaneiⁿ'yo' nt'omcheⁿ nnom ñ'oom na tjachuii' s̄aq neiⁿtyaya na nñeⁿquia'yo' ñ'oom na ma'moⁿ Ty'oots'om ndaqⁿ'yo' ee juuna' xcweti, nchiiti juu na matseineiⁿ ts'aⁿ meiⁿnquia nnom ñ'oom na tjachuii!. Macanda xeⁿ na matseiteincoo' ts'aⁿ ñ'oom'ñeeⁿ cha joo nn'aⁿ tmaaⁿ na macwji' Ty'oots'om cwentaaⁿ'aⁿ nnc'oonajndāna nc'e Espíritu Santo. ⁶ Jo' chii 'o nn'aⁿya na cwilayu'yo', meiⁿchjoo xocateijndeiina' 'o na nncjocandoⁿ'a 'o xeⁿ na matseinaⁿ cweⁿ ñ'oom na tjachuii', s̄aq xeⁿ na nntseinaⁿya ñ'oom na jndā t'moⁿ Ty'oots'om nooⁿya, oo cwii ñ'oom na matsei'ñqⁿ'a cantyja 'naaⁿ' ñ'oom'm, oo cwii ñ'oom cantyja 'naaⁿ' 'naaⁿ na quia nluii, oo cwii ñ'oom na m'mooⁿ ndaqⁿ'yo', nmeiⁿ mayuu' nntejndeⁿiina' 'o. ⁷ 'Naⁿ na cwitjoⁿ cha'na tsmaaⁿ ñequio arpa, xeⁿ nchii tjachuii' jndyeena', xotsei'ñqⁿ' ts'aⁿ cwaanⁿ cwii joona' macjoⁿ ts'aⁿ. ⁸ Ndoⁿ sondaro na matiom jndye ntu, xeⁿ tijndaa' c'uua jndye mach'een, tixocalaⁿc'eendye nc'iaaⁿ'aⁿ na nl'ana ndia'. ⁹ Maluaa' matseijomna' cantyja 'naaⁿ'yo', xeⁿ ñ'oom na cwilaneiⁿ'yo' tijndaa' joona' na cwindye nn'aⁿ, ¿chiuuya na nla'nqⁿ'na ljoⁿ na cwindu'yo? Nntseijomna' cantyja 'naaⁿ'yo' cha'cwijom ts'aⁿ cweⁿ matseixaato quii' jndye. ¹⁰ Nnts'aacheⁿa jndye nnom na tjachuii' na cwila'neiⁿ nn'aⁿ tsjoomnancue, ndoⁿ cwii cwii joona' majndaa' ljoⁿ ma'moⁿna'. ¹¹ S̄aq xeⁿ titsei'ñqⁿ'a ljoⁿ ma'moⁿ ñ'oom na matseineiⁿ ts'aⁿ cwii ñ'oom'ñeeⁿ,

nntseijomna' ja cha'cwijom ts'aⁿ cwiichenⁿ ndyuuaa
ndo' maljo'yu ntyjeeⁿ ñ'eⁿ ja. ¹² Jo' chii nc'e na
cwila'queeⁿ n'om'yo' na nñequiaa Espíritu Santo
na nlaxmanⁿyo' ts'iaaⁿ 'naaⁿ'aⁿ, cjoo'ya n'om'yo'
na jndye nnom ts'iaaⁿ 'naaⁿ'aⁿ na nla'xmaⁿ'yo'
na nñequiaana' na nnc'oonajndann'aⁿ tmaaⁿ
cwentaa^t Ty'ooots'om.

¹³ Jo' chii ts'aⁿ na matseineiⁿ ñ'oom na tjachuii',
caⁿ nnom Ty'ooots'om na nndaña nntseiteincoom'm
juuna'. ¹⁴ Ee xeⁿ matseina^an nnom Ty'ooots'om
ñequio cwii nnom ñ'oom na tjachuii' na nchii
ñ'oomya, na mayuu' matseinaⁿya ñequio espíritu
'naⁿya saa^t tic'oom' ts'ooⁿ cantyja na mats'aa.
¹⁵ Quia jo' ¿chiuu macaⁿna' na cats'aa? Matsona'
na catseinaⁿya cantyja 'naaⁿl espíritu 'naⁿya ndo'
mati ñequio na nla'noⁿya nn'aⁿ ljo' na matseina^an.
Macaⁿna' na cataya ñequio espíritu 'naⁿya ndo'
mati ñequio na cwila'noⁿya nn'aⁿ ljo' na mataya.
¹⁶ Xeⁿ quia na matseineiⁱ ñ'oom na tjachuii'
matseit'maaⁿndyu' Ty'ooots'om, 'u mañequiaa' na
quianl'uaaⁿ'aⁿ ñequio na xcwee'ya ts'om', saa^t
ts'aⁿ na ticatsei'noⁿ ñ'oom na matseineiⁱ, ¿chiuu
nnts'aayuu na nntso Amén? ee cha ntyjii ñ'oom
na matseineiⁱ. ¹⁷ Nnts'aachenⁿna' na 'u xcwe
mañequiaa' na quianl'uaa' Ty'ooots'om saa^t ticatei-
jndeina' tsaⁿñeeⁿ na nncjaanajneiⁿ na matseiy-
oom'm. ¹⁸ Mañequia na quianl'uaa' Ty'ooots'om na
majndyeti ñ'oom na cwichuii' matseinaⁿya, nchiti
'o, ¹⁹ saa^t quia na m'aaⁿya quii'ntaaⁿnn'aⁿtmaaⁿ
na macwji Ty'ooots'om cwentaaⁿ'aⁿ, yati ntyjii na
cwe' ñe'om ñ'oom nntseina^an na ya nla'noⁿ nn'aⁿ,
nchiiti quii meiiⁿ ñ'oom ñequio ñ'oom na tjachuii'.

²⁰ 'O nn'aⁿya na cwilayu'yo', cantyja 'naaⁿl natia,

calá'xma^{n'}yo' cha'na yonch'u saá cantyja 'naa^{n'} na m'aa^{n'} n'om'yo' ñ'oomwaa', calá'xma^{n'}yo' cha'na nn'aⁿ na jndá tquiee n'om. ²¹ Ee naquii' ñ'oom' Ty'oots'om na teiljeii matsona': “Ñequio ñ'oom na cwichuii' na cwila'nein nn'aⁿ nt'omcheⁿ ndyuuaa nntseinaⁿya ndáa nn'aⁿ tyuaawaa saá meiiⁿ na lúua' tixocala'ñ'oom'ndyena chiuu matsjooⁿ, lúua' matso nqueⁿ na tseixmaaⁿ na catsaⁿntjoom. ²² Quia na nndáa nntseinein ts'aⁿ ñ'oom na tjachuii' ñequio ñ'oom na maxjeⁿ matseineiiⁿ, juu jo' tseixmaaⁿna' 'naaⁿ jo ndáa nn'aⁿ na tyoola'yu'. Saá juu na nndáa nntseinein ts'aⁿ ñ'oom na jndá t'moⁿ Ty'oots'om nnoom tseixmaaⁿna' 'naaⁿ jo ndáa nn'aⁿ na cwila'yu', nchii cwentaa nn'aⁿ na tyoola'yu'. ²³ Ee quia cwitjomndyo' na laxma^{n'}yo' tmaa^{n'} na macwji' Ty'oots'om cwentaaⁿna', ndo' xeⁿ cha'tsondyo' cwilanei^{n'}yo' ñ'oom na tjachuii', ndo' jo' jo' nncjaquiee' cwii ts'aⁿ na quia mandiicheⁿ ñ'oom' Ty'oots'om oo ts'aⁿ na tyootseiyu' jom, nntseitiuutoom na 'o jndá teintjeiⁿndyo'. ²⁴ Saá xeⁿ cha'tsondyo' cwilanei^{n'}yo' ñ'oom na ma'moⁿ Ty'oots'om ndáaⁿyo' ndo' xeⁿ juu xjeⁿñneeⁿ nncjaquiee' cwii ts'aⁿ na tyootseiyu' oo ts'aⁿ na quia mandiicheⁿ ñ'oom' Ty'oots'om, nlco'tiana' ntyjeeⁿ na waa jnaaⁿna' ndo' nnc'oom' ts'oom cantyja 'naaⁿna' nc'e ñ'oom na cwilanei^{n'}yo'. ²⁵ Ndo' na ljo' nleitquioo' cha'tso na wanty'iuu' na m'aa^{n'} ts'oom. Quia jo' lcoom'm xtyeeⁿ na nntseit'maa^{n'}ñê Ty'oots'om ndo' nntsei'nooⁿoⁿ na mayuu'cheⁿ m'aaⁿ Ty'oots'om quii'ntaa^{n'}yo'.

Cha'tso canda^aya caluii xjeⁿ na cwitjomndyena

26 Quia jo' 'o nn'aⁿya na cwila'yu'yo' quia cwitjomndyo' na cwila't'maaⁿndyo' Ty'oots'om, nt'omndyo' 'o cata'yo' salmos, nt'omndyo' 'o cat'moⁿyo' ñ'oom na jndaq t'moⁿ Ty'oots'om ndaq'yo', nt'omndyo' 'o ndaq nlaneiⁿyo' nt'omcheⁿ nnom ñ'oom na tjachuii' ñequio ñ'oom na maxjeⁿ cwilaneiⁿyo', ndo' nt'omcheⁿ nc'iaa'yo' cala'teinc oo'na chiuu cwit'moⁿ n'oom'ñeeⁿ. Saa cha'tso na cwil'a'yo' caluina' na cateijnde iina' na nnc'oonajnda nn'aⁿ na cwila'yu'. **27** Quia na m'aⁿ nn'aⁿ na cwila'neiⁿ ñ'oom na tjachuii', ñequio'cheⁿ ñe'we oo ndyeendyena na nla'neiⁿna. Cwii ndo' cwiindyena nla'neiⁿna ndo' mati ñ'eⁿ ts'aⁿ na nntseiteincoo' ñ'oom'ñeeⁿ. **28** Ndo' xeⁿ quii'ntaaⁿ nn'aⁿ tmaaⁿ cwentaa' Ty'oots'om tjaan'aⁿ ts'aⁿ na nndaq ntseiteincoo' ñ'oom'ñeeⁿ, yati na tintseineiⁿ ñ'oom na tjachuii' ndaq nn'aⁿ na cwila'yu'. Cwe' naquii' ts'om nquii catseineiⁿ ñequio Ty'oots'om. **29** Ndo' cantyja 'naaⁿ nn'aⁿ na cwila'neiⁿ ñ'oom na ma'moⁿ Ty'oots'om naquii' n'om, cala'neiⁿ meiiⁿ we oo ndyeendye joona ndo' nt'om nc'iaana queⁿ cwenta aa xcwe n'oom'ñeeⁿ. **30** Saa xeⁿ waa na m'moⁿ Ty'oots'om nnom cwiicheⁿ ts'aⁿ na wacatyeeⁿ jo' jo', quia jo' juu ts'aⁿ na mañe quiaa ñ'oom quiaaⁿ na wanaaⁿ na nntseineiⁿ tsan'ñeeⁿ. **31** Ndo' na luan' cwii ndo' cwii ts'aⁿ nndaq nntseineiⁿ ñ'oom na ma'moⁿ Ty'oots'om naquii' ts'om cha nnc'ooliu nn'aⁿ na cwila'yu' ndo' nnc'oola'nqⁿtina. **32** Juu ts'iaaⁿ na mañe quiaa ts'aⁿ ñ'oom na ma'moⁿ Ty'oots'om naquii' ts'oom, matsona' na joo nn'aⁿ na cwiñequiaa ñ'oom c'omna xjeⁿ 'naaⁿ x'iaana na tjom cwiñequiana ñ'oom. **33** Ee Ty'oots'om nchii cañ'eeⁿ cwiluiñê, jom

cwiluiiñê na tjoom' m'aⁿ nn'aⁿ ñequio nc'iaana.

Cha'xjeⁿ cwiwijndaa' quii'ntaaⁿ cha'tso ntmaa^{n!} nn'aⁿ na macwjee^{n!}eⁿ cwentaa^{n!}aⁿ, ³⁴ quia na cwitjomndye nn'aⁿ na nla't'maa^{n!}ndyena Ty'oots'om, matsona' na joo yolcu ñema'cheeⁿndyo c'omna ee ticwanaaⁿ na nla'neiⁿna xje^{n!}ñeeⁿ. Macaⁿna' na c'omna nacje 'naaⁿ s'aana cha'xjeⁿ na matsaⁿntjom ljeii 'naa^{n!} Ty'oots'om. ³⁵ Xeⁿ waa ñ'oom na ñ'caliuna, quiejndyeena w'aana, quia jo' cata'x'ena ñ'oom'ñeeⁿ ndaq s'aana. Ee tixcwe na mawax'ee yuscu cwii ñ'oom quia cwitjomndye nn'aⁿ na cwila't'maa^{n!}ndyena Ty'oots'om.

³⁶ C'oom' n'om'yo' na nchii quii'ntaa^{n!} 'o jnaⁿjndyee ñ'oom' Ty'oots'om, meiⁿ nchii macandä ñencjo'yo' na jndä to'ñoom'yo' juuna'. ³⁷ Xeⁿ m'aaⁿ 'ñeeⁿ cwiindyo' 'o na matseitiuu na cwiluiiñe ts'aⁿ na mañequiaa ñ'oom' Ty'oots'om oo na waa cwii nnom ts'iaaⁿ na mañequiaa Espíritu na matseixmaⁿ, catsei'nog^{n!}oⁿ na ñ'oomwaa' na matseiljeiya, ñ'oom na matsaⁿntjom Ta Jesús juuna'. ³⁸ Saaⁿ xeⁿ titseiñ'oom'ñie ñ'oomwaa', tila'ñ'oom'ndyo' jom.

³⁹ Jo' chii 'o nn'aⁿya na cwila'yu', cala'queeⁿ n'om'yo' na nndaq nñequia'yo' ñ'oom' Ty'oots'om. Meiⁿ ticala'cu'yo' nn'aⁿ na cwila'neiⁿ nt'omcheⁿ nnom ñ'oom na tjachuii'. ⁴⁰ Saaⁿ cha'tso cantyja na cwitjomndyo', caluiina' cha'xjeⁿ na matsona' ndo' ñequio na xcweya m'aaⁿna'.

15

Cristo jnda mawando'xcoom

¹ Ndo' je' je' 'o nn'aⁿya na cwila'yu'yo', matseilcwii'ndy^ñonnda'a joo ñ'oom naya na jnd^a ñet'mooⁿya ndaa^a'yo'. Ñ'oom'ñeeⁿ jla'yu'yo' ndo' hasta xjeⁿ je'cheⁿ ndicwaⁿ tyeⁿ m'aⁿ'yo' cantyja 'naaⁿ' juuna!. ² Nc'e juu ñ'oom naya'ñeeⁿ cwilui'n'maaⁿndye añmaan'yo' xeⁿ cwiljoo'ndyo'tyeⁿ'yo' cantyja 'naaⁿ' ñ'oom na tyoñequiaya ndaa^a'yo', mein ticwe' ts'iaan'ndyo na jla'yu'yo!. ³ Tyo'mooⁿ ndaa^a'yo' ñ'oom na to'ñ^onya na t'manti tseixmaⁿna', na tue' Cristo cwentaa' jnaaⁿya cha'xjeⁿ cwit'mooⁿ ñ'oom' Ty'oots'om na teiljeii, ⁴ ndo' na ty'iuu nn'aⁿ jom, saa^a xuee na jnd^a ndyee tquiaa Ty'oots'om na tando'xcoom cha'xjeⁿ na matso ñ'oom'm na teiljeii, ⁵ ndo' teitquioo'ñê nnom Pedro nda^a jo' ndaa^a cha'tso apóstoles. ⁶ Jnd^a jo', teinoom' 'om siarnto nn'aⁿ na cwila'yu', ñejom teitquioo'ñê ndaa^ana na majndyendyeti naaⁿ'ñeeⁿ ndicwaⁿ cwita'ndo'na je' saa^a nt'om jnd^a tja. ⁷ Jnd^a jo' teitquioo'ñê nnom Jacobo ndo' jnd^a jo' teitquioo'ñê ndaa^a cha'tsondye apóstoles. ⁸ Ndo' na macand^a mati teitquioo'ñê nooⁿ ja. Matseijomna' cantyja 'naⁿya cha'cwijom cwii yu'ndaa na jnd^a teinom'na' xjeⁿ na nluiiñe. ⁹ Ee cha'tso nt'omcheⁿ apóstoles, t'manti cwiluiindyena nchiiti ja, mein ticatseixmaⁿya na nntseicajndyu'na' ja cwii apóstol ee tyoco'wi'a tmaaⁿ' nn'aⁿ na macwjji' Ty'oots'om cwentaaⁿ'aⁿ. ¹⁰ Sa^a na matseixmaⁿya apóstol je', matseixmaⁿya jo' nc'e naya na matseixmaⁿ Ty'oots'om, mein ticwe' ts'iaan'ndyo juuna!, ee seijndotyaya naquii' ts'iaaⁿ 'naaⁿ'aⁿ, nchiiti nt'omchen apóstoles, mein nchii cwiluii ts'iaaⁿ'ñeeⁿ cwe' cantyja 'naⁿ nnco,

s  a   cwiluii juuna' nc'e naya'  ee   na matseixmaa  .
11 Quia jo' tints'aa aa ja oo aa joona.   oomwa'   oom na cwi  equiay  , ndo' juuna'   oom na jnd   jla'yu'yo'!

Nnta'ndo'xco nn'a   na jnd   tja

12 Cwi  equiaay     oom na tando'xcoom jnd   na tuee  e  , quia jo'   chiuu na   ee  ndyo' 'o na cwindu'yo' na taxocata'ndo'xco nn'a   na jnd   tja? **13** Ee xe   tiyuu' na nnta'ndo'xco nn'a   na jnd   tja, quia jo' mei   nquii Cristo t  cwando'xcoom. **14** Ee xe   t  cwando'xcoom quia jo' juu   oom na cwi  equiaay   cwe' ts'iaa  ndyo juuna' ndo' mati juu na cwila'yu'ya n'om'yo' cwe' ts'iaa  ndyo. **15** Ee xe   na mayuu' na ljo', quia jo' matseijndaa'  ena' cantyja 'naa  y   na cwil'aay   na cantu  e Ty'  ots'om ee jnd   macwil'uuy   na tquiaa   na tando'xco Cristo s  a   xe   xocata'ndo'xco nn'a   na jnd   tja mei   xocats'aana' na mayuu' na tando'xcoom. **16** Ee joo nn'a   na jnd   tja, xe   xocata'ndo'xcona, quia jo' mei   nquii Cristo t  cwando'xcoom, **17** ndo' xe   t  cwando'xcoom cwe' ts'iaa  ndyo juu na cwilayu'ya n'om'yo'   e  n  . Ndicwa   cho' nque  n'yo' jna  n'yo'. **18** Ee xe   lcaa' waa mati nn'a   na   ejla'yu'   e  n   na jnd   tja, jnd   tsuundye. **19** Ee juu na cwicantyja' n'  o  ny  a Cristo xe   macand   xje   na cwitando  a je' mawa  oom'na' jaa, wanty'iaa'ndyotyaaya na cha'tsondye nn'a  .

20 S  a     oom na mayuu'che   na tquiaa Ty'  ots'om na wando'xco Cristo. Matseijomna' cantyja 'naa  n'a   cha'cwijom ntjom na cwiwe' jndyee ee quii'ntaa   l'oo jom ts'a   najndyee na

tando'xco. ²¹ Cantyja 'naaⁿ' cwii ts'aⁿ, jnaⁿna' na cwiwje nn'aⁿ tsjoomnancue. Mati cantyja 'naaⁿ' cwii ts'aⁿ jnaⁿna' na cwita'ndo'xco nn'aⁿ. ²² Ndo' cha'xjeⁿ cantyja 'naaⁿ' Adán cha'tsondye nn'aⁿ cwiwje, mati cantyja 'naaⁿ' Cristo, cha'tsondye nn'aⁿ nnta'ndo'xcona. ²³ Sąq majndaa' na nluii na ljo': najndyee tando'xco Cristo, ndą jo' quia na nncwjee'rnnaaⁿaⁿ, nnta'ndo'xco nquiee nn'aⁿ na cwiluiindye cwentaaⁿaⁿ. ²⁴ Quia jndą seityuii' Cristo cha'tsoñ'eⁿ na cwila'xmaⁿ na cwiqueⁿ xjeⁿ, ñequio cha'tso na cwitsantjom, quia jo' nntycwii cha'tsoñ'eⁿ. Ndą jo' nquii na cwiluiññe na matsa'ntjoom, nñequiaaⁿ cwenta jo' l'o Tsotyeeⁿ Ta Ty'oots'om. ²⁵ Ee tseixmaaⁿ na nntsa'ntjoom hasta xjeⁿ na jndą tju'cje Tsotyeeⁿ nacjee' nc'eeⁿ cha'tso na cwi'oo nacjoom'm. ²⁶ Juu na macandaⁿ na nntseityueeⁿeⁿ na matseiweñe nacjoom'm, juu na mach'ee na cwiwje nn'aⁿ. ²⁷ Ee jndą tju'cje Ty'oots'om cha'tso nacjee' nc'ee Cristo, jo' chii quia na matsona' naljo', cwiwitquoo'ya na tic'oomna' nquii Ty'oots'om. Ee jom cha'tso jndą tqueen nacje 'naaⁿ' Cristo. ²⁸ Nquii Cristo cwiluiññe Jnda Ty'oots'om. Quia jndą s'aaⁿ na cha'tso na niom cwitue'ndyecje jo nnoom, quialjo' manquiityeeⁿ nncju'ñecjeeⁿ nnom Ty'oots'om cha nntseixmaⁿ na tjacantyja na t'maⁿ cwiluiñe jo ndąq cha'tsoñ'eⁿ.

²⁹ M'aⁿ nn'aⁿ na cwiwits'oomndye cwentaa nn'aⁿ na jndą tja. Sąq xeⁿ na mayuu' tjaal'naⁿ na cwita'ndo'xco nn'aⁿ na jndą tja, quia jo' ¿ljo' ts'iaaⁿ' na cwiwits'oomndyena cwentaa l'oo? ³⁰ Ndo' xeⁿ ticata'ndo'xco nn'aⁿ na jndą tja ¿chiuu na jâ cha'tso

xjeⁿ m'aaⁿyâ na teincuu' waa na cwitjooⁿyâ? ³¹ Ee 'io ndi 'io m'aaⁿya na teincuu' na ñe'catseicuee'na' ja. Ndo' na ljo', ñ'oom na mayuu' jo' cha'xjeⁿ mati na mayuu' na mañequaana' na neiⁿya na cwiluindyo' nn'aⁿ na cwila'yû' ñequio Jesucristo na nqueⁿ cwiluiñê na matsaⁿtjoom jaa. ³² Tsjoom Éfeso seijndoya cwii ts'ooⁿ ñequio quioo' wje saa meiiⁿ na ljo' ¿yuu waa na mawantjoⁿ? Ee xeⁿ na mayuu' na ticata'ndo'xco nn'aⁿ na jnda tja yati cal'aaya cha'xjeⁿ cwilue nn'aⁿ: "Cwa cwa'a ndo' cwaaya ee 'iocha lcaa' nncwjaaya."

³³ Tiñe'quiandyo' na ñe'nquiu'nn'aⁿna' 'o. Waa ñ'oom na matso ts'aⁿ: "Joo nn'aⁿ na tis'a la'xmaⁿ cwila'ndaa'na ts'iaaⁿ na ya na cwilui." ³⁴ C'oom'nnda' n'om'yo' cha'xjeⁿ na matsona' na cal'a'yo'. Tsacwi'ntyje'yo' na cwil'a'yo' jnaⁿ ee m'aⁿ nt'omndyo' 'o na ticalaxmaⁿ'yo' cantyja 'naaⁿ Ty'oots'om. Matsjoo na ljo' cha calui'jnaan'ndyo'.

Nmeiiⁿ nlaxmaⁿ seii nn'aⁿ na nnta'ndo'xco

³⁵ Nnts'aachen'na' m'aaⁿ cwii ts'aⁿ na nncwax'eeⁿ: "¿Chiuu nluiiyuu na nnta'ndo'xco nn'aⁿ na jndä tja? ¿Chiuu mmaⁿ sei' na nla'xma'na?" ³⁶ Tijndo' ts'om ts'aⁿ na lcaa' nncwax'ee, ee tsjaan' na nnom' ts'aⁿ cha'cwijom nncue'na' cha nncwando' ntjom'ndaa. ³⁷ Quia na wjaacanom' ts'aⁿ, nchii ts'oomtsjoo wjaacanoom'm, nnaⁿ wjacanoom'm oo tsjaan' lqueen' trigo oo cwiichen' nnom tsjaan'. ³⁸ Jndä na jnom' ts'aⁿ tsjaan'ñeeⁿ, nquii Ty'oots'om mañequiaaⁿ chiuu mmaⁿna' cha'xjeⁿ na l'ue ts'om. Cwii cwii nnom tsjaan' mañequiaaⁿ

na nntseixmaⁿ juuna' cha'xjeⁿ na macaⁿna'.
39 Cha'tso sei' tiñecwii xjeⁿ la'xmaⁿna'. Nn'aⁿ la'xmaⁿna cwii nnom sei', quioo' wandyo' seiiyo' ndo' cantsaa ñequio calcaa cwiicheⁿ nnom sei' la'xmaⁿyo'. **40** Mati m'aⁿ cancjuu tsjo'luee ndo' m'aⁿ nt'om nnom na cwita'ndo' na tqueⁿ Ty'ooot'som nnom tsjoomnancue, ndo' joo na m'aⁿ tsjo'luee cwichuii' na neiⁿncoo' joona' ñequio juu na neiⁿncoo' joo na m'aⁿ nnom tsjoomnancue.
41 Juu na caxueeñe ñe'quioom' cwichuii'na' ñequio na xuee chi' ñequio juu na caxueendye cancjuu, ndo' joo cancjuu cwichuii' na xueena' ñequio nt'omcheⁿ cancjuu.

42 Maluaa' waa na matseijomna' na cwichuii' na nla'xmaaⁿya quia na nntando'xcooya. Sei'ts'o na wjaanty'iuu'ñe ts'aⁿ tseixmaⁿna' cwii na nto' sãa quia na nncwando'xcona', nntseixmaⁿna' cwii na tijoom cwii cue!. **43** Juu ts'oo na nncjanty'iuu' tseixmaⁿna' cwii na tal'ue sãa jeeⁿ neiⁿncoo' tseixmaⁿna' quia na nncwando'xcoom. Quia na wjaanty'iuu'ñe ts'oo, meiⁿcwii tjaa na nnda^a nnts'aaⁿ, sãa quia na nncwando'xcoom jeeⁿ t'maⁿ najneiⁿ. **44** Quia na wjaanty'iuu' sei'ts'o 'naaⁿ' ts'aⁿ tseixmaⁿna' cantyja 'naaⁿ' tyuua, sãa quia na nncwando'xcona' tseixmaⁿna' cantyja 'naaⁿ' Espíritu Santo.

45 Maluaa' waa na ma'moⁿ ñ'oom' Ty'ooot'som na teiljeii, matsona!: "Adán ts'aⁿ najndyee, tuiiñe ñ'eⁿ ts'o ndo' s'aaⁿ na tando!", saa nquii Adán na macanda^a cwiluiiñe Espíritu, jom mañequiaaⁿ na cwita'ndo' nn'aⁿ. **46** Nchii juu cantyja 'naaⁿ' Espíritu tyowaajndyee, tyowaajndyee cantyja 'naaⁿ' tyuua, jnda^a jo'

chii tuaa cantyja 'naaⁿ' Espíritu. ⁴⁷ Juu ts'aⁿ na t'oomjndyee s'aa Ty'oots'om juu ñ'eⁿ ts'o, tyotseixmaaⁿ cantyja 'naaⁿ' tyuua. Saa nquii ts'aⁿ na jndq we cwiluiñê na matsa'ntjoom, tseixmaaⁿ cantyja 'naaⁿ' cañoom'luee. ⁴⁸ Seii'a nmeiiⁿ la'xmaⁿa' cha'na ts'aⁿ na tuiñejndyee ñequio ts'o. Saa seii'a na nlaxmaaⁿya quia na nntandoo'xcooⁿya nlaxmaaⁿya cha'na seii' nqueⁿ na m'aaⁿ cañoom'luee.

⁴⁹ Cha'xjeⁿ tyowaa Adán na s'aa Ty'oots'om maluaa' cwimaan'a. Mati xjeⁿ na nntandoo'xcooⁿya mmaaⁿa cha'xjeⁿ waa Cristo na m'aaⁿ cañoom'luee.

⁵⁰ 'O nn'aⁿya, ñe'catsjooya ndaq'yo' sei' ñequio ndei' leicandaa nntseijomna' joona' yuu na matsa'ntjom Ty'oots'om mein 'naⁿ na cwiwi'ndaa' xocandaa nntseijomna' joona' ñequio joo na ticanⁿycwii na m'aⁿ. ⁵¹ Saa l'ue ts'ooⁿna nla'noⁿyo' cwii ñ'oom na wanty'iuu' m'aⁿna'. Ticha'tsondyo nncwjaaya saa cha'tsondyo nntseichuiina'. ⁵² Jeeⁿ cjee na nluii na ljo' cha'na cwii ndii' na nntseitsja ts'aⁿ lua'nном, xjeⁿ na nleic'uaa ndu na macanda. Ee maxjeⁿ nleic'uaa ndu ndo' nnta'ndo'xco nn'aⁿ na jndq tja na tajom cwjennda'na. Ndo' nntseichuii'na' jaa. ⁵³ Ee jaa seii'a nmeiiⁿ na teincoondyo na wjaawi'ndaa'na' nlcwee'na' cwii na tijoom cwi'ndaa'. Jaa seii'a na nncue'na' nlcwaa'a cwii na tijoom ncue', m'aaⁿ ndo' m'aaⁿna'. ⁵⁴ Ee juu na laxmaaⁿya na cwiwi'ndaa'na', quia na jndq tcweena' juu na tijoom cwi'ndaa' ndo' juu seii'a na jaawe'na' quia na jndq tcweena' na tijoom cue', xjeⁿñeeⁿ nntseicandaa'ñena' ñ'oom' Ty'oots'om na teiljeii

na matsona': "Jndā seityuii' Ty'oots'om najndeii na mach'ee na cwiwje nn'aⁿ. ⁵⁵ 'U na mache' na cwiwje nn'aⁿ, ¿je' je' yuu waa na cwii nndaā ntsa' ñ'eñndyo? Meiñchjoo tjaa yuu cwii cuua na ncwantjom!" ⁵⁶ Juu jnaⁿ na laxmaaⁿya waa najndeii na matseixmaⁿna', jo' chii cwiwjaaaya. Ndo' juu ljeii na tqueñ Moisés waa najndeii na matseixmaⁿna' na mañequaana' na cat'uii jnaⁿ jaa. ⁵⁷ Saa jndye na quianl'uaa' Ty'oots'om na mañequiaaⁿ na cwinaⁿndyo nc'eñquii Ta Jesucristo na matsa'ntjoom jaa.

⁵⁸ Nc'e na luea', 'o nn'aⁿya na jeeⁿ wi' ts'ooⁿya, caljoo'ndyo'tyeⁿyo' ñequio Ty'oots'om, ñecwiitco titsawintyje'yo' na cwindye'ntjom'yo' nnom Ta Jesús ee manquiujndaa'ndyo' na jeeⁿ ticwe' ts'iaaⁿndyo juu ts'iaaⁿ nats'aⁿ nnoom.

16

Cwila'tjomna s'om na nl'ana naya nc'iaana na m'aⁿJerusalén

¹ Cantyja 'naan' ñ'oom na nla'tjom'yo' s'om na nl'a'yo' naya nn'aⁿ cwentaa' Ty'oots'om na wi' m'aⁿna Jerusalén, luea matseijndo'a n'om'yo'. Cal'a'yo'cha'xjeⁿna tsjoo na cal'a ntmaan' nn'aⁿna macwji' Ty'oots'om cwentaaⁿaⁿ ndyuua Galacia. ² Ticwii xueeneiⁿco' cwii cwiindyo' 'o calat'ue'yo' cwantia na nñequia'yo' cantyja na cwitantjom'yo'. Quia jo' quia na nncuaya quii'ntaaⁿyo' nchii s'om quia nlat'ue'cheⁿyo'. ³ Ndo' catjeii'ndyo' cwii oo we x'iaa'yo' na cwila'nqⁿyo' na joona ya na nnc'ooñ'omna s'om'ñeeⁿ Jerusalén. Quia jo' quia na nncuā na m'aⁿyo', nntseiljeiya cwii tsom na

nnc'ooñ'omna. ⁴Ndo' xeⁿ maca^{nna'} na nncjo^o jo' jo', quia jo' nnc'oona ñ'eⁿndyo.

Ñe'cjaacando' Pablo nn'aⁿ na cwila'yu' Corinto

⁵Nncjo na m'aⁿ'yo' xeⁿ jndä tjowinooⁿ ts'ooonda Macedonia ee maxjen matseijndaa'ndyo na jo' jojndyaä. Jnda jo' nncuacaño^oya 'o. ⁶Nndaa nnts'aana' na nljoo'ndyo ñ'eⁿndyo' meiiⁿ ñe'cwantindyo xuee oo cha'waa ncueeteiⁿ. Quia jo' 'o nndäa^q nnts'ala'wanom'yo' ja nato quia na nncjo xeⁿ yuu cwijoyo. ⁷Ee ticaljoya ts'ooⁿ na cwe' cjee cjee m'aan'a' nncwinooⁿ na m'aⁿ'yo'. Ntyja'a ya cwii ts'ooⁿ na majndye xuee nndäa^q nljoo'ndyo ñ'eⁿndyo', xeⁿ Ty'oots'om l'ue ts'oom. ⁸Saq^a jndä seijndaa'ndyo na nljoo'ndyotya ñjaanⁿ tsjoom Éfeso hasta na jndä teinom xuee Pentecostés. ⁹Ee jeen^tmaⁿ maju'naa'ñena' na mats'aa ts'iaanⁿ 'naa'ⁿ Ta Jesús ndo' jeen^t ticwe' ts'iaanⁿndyo meiiⁿ jndye nn'aⁿ m'aⁿ na jndoo ja.

¹⁰Nndäa^q nnts'aana' na nncuee'cañoom Timoteo 'o. Xeⁿ na ljo', cala'lui'yo' jom cha nljeii'na' na ya nnc'oomñê ñ'eⁿndyo!. Ee mati jom mañejuu ts'iaanⁿ 'naa'ⁿ Ta Jesucristo mach'een^t cha'xjeⁿ ja. ¹¹Jo' chii mei'cwiindyo' 'o tinc'om'yo' na tila'ñ'oom'ndyo' jom. Ñequio na xcwee' n'om'yo' cateijnde'iyo' jom cha quia nlueeⁿeⁿ quii'ntaaⁿ'yo' quia jo' nndyol-cweenⁿeⁿ ñequio na neiiⁿeⁿ. Mei'ndo^a jom ñequio nt'omcheⁿ nn'aⁿ na cwila'yu'.

¹²Tyocaⁿ'a nnom nquii nn'aanya Apolos na catseijomñê ñequio nn'aanya na cwila'yu' na cwi'oocajndoo'na 'o. Sa^a na maje'ndyo ticats'aana' ts'oom na ñe'cjaⁿ. Majo' nncuee'cañoom 'o quia na nñequiaana' na wanaaⁿ.

Xmaⁿndyo' na cha'tsondyo'

13 Queⁿl queⁿl yo' cwenta chiuu cwii tsam'aⁿti'yo'. C'om'tyeⁿl yo' na cwila'yu'ya n'om'yo' ñ'eⁿ Ty'ooots'om. Catsanajndaⁿl yo' cantyja na cwila'yu'yo' ñ'eⁿñê cha'na nn'aⁿ na 'ooquiendye na ñe'cwii waa na cwil'a. **14** Cha'tso na cwil'a'yo', cat'moⁿl yo' na wi' n'om' nc'iaa'yo'.

15 'O nn'aⁿya, manquiu'yo' na cha'waa ts'oondaa Acaya, juu Estéfanas ñequio nn'aⁿ waⁿaⁿ jla'yu'jndyeena ñ'eⁿ Ty'ooots'om. Joona cwijoo' n'omna na cwindye'ntjomna ndaq nn'aⁿ na cwila'yu' ñ'eⁿñê jo' jo'. **16** Macwe' jo' macaⁿl a na catue'ndyo'cje'yo' ndaq nn'aⁿ na la'xmaⁿ cha'na joona. Ndo' malaa'ti' cal'a'yo' ñequio cha'tso nn'aⁿ na cwilajomndye ñ'eⁿndyena na cwiteijndeii ts'iaaⁿ 'naaⁿl Ty'ooots'om. **17** Jeeⁿ neiⁿya na jndaq tyjee'cañoom Estéfanas ja, ñequio Fortunato ñequio Acaico. Cha'cwijom mantyl'iaya ncjo'yo' na mantyl'iaya joona, ee jndaq jla'noomndyena cantyja 'naⁿya cwii na leicandaa nl'a'yo' na tic'oomndyo'. **18** Na jndaq tquienaa na m'aaⁿya, ñ'oom na jla'candiina ja tquiaana' na t'maⁿ ts'ooⁿ, majo'ti nnts'aana' ñ'eⁿndyo' 'o quia na nlquiennda'na na m'aⁿl yo'. Nn'aⁿ na cwindye'ntjomna cha'na joona matsona' na nla't'maaⁿndye nn'aⁿ joo naⁿñeeⁿ.

19 Ntmaaⁿl nn'aⁿ na macwji' Ty'ooots'om cwentaaⁿl aⁿ na m'aⁿ ts'oondaasi Asiawaa cwila'cwanomna na xmaⁿndyo'. Majuu nn'aⁿya Aquila ñequio scoom'm Priscila cwiluena na xmaⁿndyo' ndo' majo'ti cwilue nn'aⁿ tmaaⁿl na cwitjomndye w'aana ñequio xuee' nqueⁿ na cwiluiñê na matsaⁿntjoom jaa. **20** Cha'tsondye

nn'aⁿ na cwila'yu' ñjaanñe cwila'cwanomna na xmaⁿndyo'. Nc'e na cwiluiindyo' ntseinda Ty'oots'om, quia cwitjomndyo' ñ'eⁿ nc'iaa'yo' na tjoom' cwila'yu'yo' ñ'eⁿndyena, cataⁿ'yo' lueena na cwiñe'quia'yo' na xmaⁿndyena.

²¹ Nncq Pablo na matseiljei xueya na matsjooya na xmaⁿndyo'.

²² Meiⁿcwi'ñeeⁿcheⁿ ts'aⁿ na ticajnda ntyiji nquii Ta Jesucristo, quiaa Ty'oots'om na quioo ñ'oomwi' nacjoo' tsaⁿ'ñeeⁿ. Quiaaⁿ na matyuaa' cwjee'nnda' nquii Ta Jesucristo.

²³ Nquii Ta Jesucristo quiaaⁿ na c'oom naya na matseixmaaⁿ ñ'eⁿndyo'. ²⁴ Mañequaana' na jeeⁿ jnda ntyijiya 'o nc'e jom. Mantyjati luala'ndyo. Amén.

**Ñ'oom xco na tqueⁿ ty'oots'om cantxja 'naa'
Jesucristo
New Testament in Amuzgo, Guerrero
(MX:amu:Amuzgo, Guerrero)**

copyright © 1999 Wycliffe Bible Translators, Inc.

Language: Amuzgo, Guerrero

Translation by: Wycliffe Bible Translators, Inc.

Amuzgo, Guerrero

amu

Mexico

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Amuzgo, Guerrero

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022
f19bf10d-b9f4-54f8-aa78-06ee36e6a7cd